

明葉向高撰

(國學文庫第十三編)

四

夷考

全

中華民國二十三年七月重印



由國家圖書館數位化、典藏

明葉向高撰

(國學文庫第十三編)

四

夷考

全

中華民國二十三年七月重印



據福唐葉文忠公全集

(萬曆年刊每半
葉十行十九字)

重印

(定價國幣壹元)

四夷考目錄

朝鮮考	一	罕東·罕東左	七五
日本考	七	沙州	七八
安南考	二一	西番考	八〇
女直考	三三	土魯番考	九一
朵顏三衛考	四〇	北虜考	九七
哈密考赤斤等衛附	五四	鹽政考	一九一
赤斤蒙古	六八	屯政考	一九一
安定 阿端	七二	京營兵制考	一九五
曲先	七四	四夷考目錄終	

四夷考上(蒼霞草卷之十九)

福清 葉向高進卿甫著

朝鮮考

朝鮮箕子封國漢初爲燕人衛滿所據傳至右渠武帝攻殺之置真番臨屯樂浪玄菟四郡漢末公孫氏晉高氏並據其地高本扶餘別種人改國號曰高麗居平壤卽樂浪也已爲唐所破東徙後唐時王建代高氏並有新羅百濟地益廣東徙松岳以平壤爲西京元至元中西京內屬置東寧路總管府畫慈嶺爲界國朝高皇帝洪武二年王顥表賀卽位遣符璽郎楔斯齎金印誥文封顥爲高麗國王使者入謝上從容問王居國何爲城郭修乎甲兵利乎宮室壯乎頓首言東海之波臣朝夕禮覺王甚恭他未

國家圖書館



001685056

皇也璽書諭王佛法非所以治國梁武後世之前車也王其母惑以王君臨一方而出令之無所其何震之有王國北接虜而南鄰倭虜創于此恐將逸于彼倭狡而貪出沒海上且窺王虛實朕私憂之設險蒐乘以固吾圉惟王念哉今以經史諸書賜王其悉朕意中書省臣言高麗使者往來私爲市非法請征其入而禁其出不聽五年顯請徙耽羅國所留蒙古人及征蘭秀山逋寇報詔耽羅爾附庸也蒙古亦人耳爾何棄焉逋寇以朕命命之傳檄可致勿用兵頃之貢馬五十正道亡其二使者以聞及馬至無恙詰之則使者所償也上責其不誠卻之七年諭中書省臣曰古諸侯事天子比年小聘三年大聘五年一朝九州外夷戎世見而已高麗去中國近知經史禮樂非他邦比宜令三年一聘不則比年聘曩高麗貢獻數

使者溷海幾不返甚失朕意丞相其明以諭王八年顓弒死子禍嗣貢不
如期卻之羈其使周誼仍勅遼東守臣絕勿通十七年表請故王諡及嗣
封不許十八年許之明年貢馬千匹布萬疋謝請易冠服不許指揮高家
奴自其國市馬歸言禍辭馬直上令給之二十一年相國李仁人廢禍立
王昌歲中兩請入朝皆不許李成桂復廢昌立定昌國院君瑤瑤嘗遣子
奭來朝奭未歸而成桂廢瑤自立王氏自五代至今傳數百年絕其國評
議司表言禍昌不當立瑤暴虐失人心國虛無王舍成桂莫適與也惟朝
廷命之上曰彼夷耳吾何誅成桂更名曰徙居漢城已請更國號詔仍稱
朝鮮二十八年入貢表語謾逮撰表者鄭總羈留之旦老請子芳遠嗣永
樂元年賜冕服經籍從芳遠請也六年世子禛來貢八年獻馬萬匹助征

虜十三年表更立子禔爲世子是年芳遠老請以禔嗣宣德元年遣使賜禔五經四書及性理大全綱目通鑑因謂禮臣是書有國家所當知朕嘉惠遠人故賜之四年禔進海東青制詔珍禽異獸非朕所貴其勿進方物効誠而已母金玉器禔再進再諭之已請遣子弟入學不許仍賜諸書俾學于國中正統四年建州夷酋凡察童倉逋居朝鮮界上別酋李滿住以爲言詔問禔亡何凡察歸建州禔表言凡察以窮歸臣臣遇之善卵翼而遂飛必索之凡察復言禔羈留其私屬請檄還不則隨以兵詔兩解之且慰藉禔國家以王爲東藩如凡察直夷畜之何敢望王彼其懷鳥獸心去留無恒王第善自備毋與較景泰元年賜禔世子珣冕服禔卒珣嗣三年卒子弘曄嗣禔而孱遜其叔瑑天順三年邊臣疏瑑私與建州夷酋董山

通已又殺毛憐酋郎卜兒哈累詔戒諭之成化三年進海青白鵲卻之時方征建州瑑遣中樞府知事康純等率兵助王師捕斬李滿住及其部落遣使來獻俘璽書褒嘉之明年瑑卒子晄嗣六年晄卒從子斐嗣復出兵助擊建州捷聞遣中使賚王金幣并及其將士弘治八年斐卒子愷嗣愷病風遜其弟懌嘉靖二十三年懌卒子崐嗣未踰年卒子峒嗣時日本入寇舟漂至朝鮮及姦民往來海上私與倭市峒輒捕以獻上亦厚賜予答其意隆慶元年峒卒從子昞嗣李氏自成桂以來事朝廷恭歲時朝貢外慶慰報謝無常期行李踵于道王嗣立則使者往封有大事則頒詔其國他夷不敢望也始成桂立高皇帝雖置不問然心惡其篡而傳者復以成桂爲仁人子故祖訓謂其父子先後弒王氏四王其後嗣當永樂正德嘉

靖閒累表自白言恭愍之弑由嬖臣倫仁人誅倫立禡禡既立則遣兵侵
遼東先臣成桂懼于上國返其兵禡遂遜位于子昌而恭愍妃安氏以禡
昌皆非王氏不當立乃黜昌立瑤瑤復不道國人請命高皇帝立先臣瞻
瑤別邸終其身先臣實未嘗爲弑而虛蒙此聲又家世出新羅司空故以
爲仁人子皆冤甚乞下史館昭雪之今上初乃得請其地東西相距二千
里南北四千里分八道統府州郡縣其設官略倣中國以田制俸刑法不
苛俗柔謹崇釋尙鬼惡殺茅居苧衣知文字喜讀書上下威儀燦然可觀
矣山川九都神嵩北岳海鴨綠江爲大產金銀鐵水晶鹽紬苧布白礮紙
狼尾筆果下馬長尾雞貂豹皮八稍魚昆布杭黍麻榛松人參茯苓
其貢道由鴨綠江歷遼陽廣寧入山海關達京師成化中苦女直邀劫請

改道職方郎劉大夏持不可議遂寢

論曰隋唐之際高麗勅矣觀其勤萬乘抗前旌固東夷之雄也明興濡沫仰流皇風淪被俎豆詩書爲冠帶國聲教遠矣彼威之而不來此柔之而愈服雖招攜有經亦先聖之遺化也成桂初興逆取順守引于今茲藩封勿替可謂盛矣而襲休日久積弱形成高皇前言徵于左券神聖之所豫謨有國家者曷可忽哉

日本考

日本古倭奴國在東海中地分五畿七道三島又附庸國百餘大者五百里小者百里最強大桀黠漢滅朝鮮通使稱王者三十餘國其後天材雲尊立累傳皆稱尊神武天皇立累傳皆稱天皇亦閒立女王時與中國通

唐咸亨初改號日本元世祖使趙良弼招之不至遣峻都范文虎將十萬兵往征至五龍山暴風舟覆軍盡沒終元世絕不通國朝洪武二年倭寇山東淮安明年再入轉掠閩浙上遣趙秩語其王良懷爾能臣則來毋患苦吾邊不能則善自爲備良懷言蒙古嘗使趙良弼好語餽我襲以兵今使者得毋良弼後乎其亦將襲我也欲刃之秩爲具言所以來宣國家威德耳豈狙汝耶良懷氣沮乃遣僧隨秩奉表稱臣入貢上亦遣克勤仲猷二僧往諭然其爲寇掠自如瀕海郡縣迄無寧歲乃下令造海舟防倭德慶侯廖永忠請備輕舸以便追逐從之七年來貢無表文其臣氏久私貢並卻之九年表貢語謾詔詰責之十三年再貢皆無表以其征夷將軍源義滿所奉丞相書來書倨甚命錮其使明年復貢命禮臣爲檄數而卻之

已復納兵貢艘中助逆臣胡惟庸惟庸敗事發上乃著祖訓示後世毋與倭通而命信國公湯和江夏侯周德興分行海上視要害地築城設衛所摘民爲兵戍之防禦甚周倭不得閒小小入與我軍相勝敗永樂元年王源道義遣使入貢上賜冠服文綺給金印道義稍捕獲諸島寇來獻賜賚甚豐封其山碑而銘之予勘合十年一貢八年道義死子源義持立遣使往封頃之我兵獻海上俘其首皆倭人羣臣請誅之上釋歸璽書下義持爾父畏天事大職貢不愆先烈之不圖而輕于上國爾罪在必討朕所以隱忍者未忘爾父之恭耳爾其思之義持奉表謝罪禮其使遣歸未幾復寇遼左都督劉榮大破之初榮偵倭至卽伏兵望海塢而別遣奇兵斷其歸路倭中伏奔捕馘無子遺當是時我方招來諸島夷絡繹海上倭乘爲

欺詐瀕海復騷賴是捷遂戢論功封榮廣寧伯宣德七年以日本貢久不
至命中使諭其王源義教明年來貢自後遞貢遞掠備嚴則貢得間則掠
與之期不遵我亦取羈縻示寬大而已倭益肆無忌至焚官庾民舍縛嬰
兒竿上沃以沸湯卜孕婦男女剖視賭勝爲樂慘毒不忍言至成化時廷
臣始有發憤議卻其貢者而竟格不行正德四年王源義澄遣宋素卿來
貢素卿者鄞人朱縞也逃入倭有寵于其王易姓名充使其族人相與耳
目爲奸利守臣白發之禮臣恐失外夷心置不問素卿厚賂閹瑾賜飛魚
服遣歸嘉靖二年再奉使至是時國王源義植辱諸島爭貢以邀利大內
藝興遣宗設謙道先素卿至俱留寧波故事夷使以先後至爲序市舶中
官賴恩墨素卿財先素卿宗設大忿相讐殺戕指揮劉錦袁璉大掠寧波

奪舟去巡按御史以聞禮臣仍右素卿以給事御史言乃下素卿獄論死
沒其貲絕貢者十七年至嘉靖十八年其王源義晴復貢乞易勘合還素
卿貲不許仍申約貢必如期舟三人百不者卻勿受夷性婪違約如故內
地奸豪往往與爲市不償直夷索逋急則恫喝官府以縱寇爲辭兵出則
陰泄之倭速其去且樹德也如是者久之倭大恨言我挾王貲而來不得
直何以歸報因盤據島中我亡命無賴及小民迫於貪酷饑寒困苦者咸
相率從亂東南之禍大作于是朱紈以巡撫蒞治之紈日夜飭兵嚴糾察
上章暴勢豪交通罪奸謀稍解紈竟爲豪所中自殺賊益猖獗三十一年
殘浙東明年犯太倉破上海崇德嘉善諸邑時王忬爲巡視忬經略摘發
頗有緒旋移大同去李天寵代將則盧鏜湯克寬俞大猷是時倭至無虛

月屯據柘林川沙窪青村陸涇壩諸處四出流剽而柘林賊最劇鏜戰孟宗堰大猷戰金山衛天寵合諸將兵戰烏程縣之窯墩皆不利別將李逢時率山東兵戰新涇橋小勝隨大敗三十三年張經爲總督經前總督兩廣有威惠計調廣兵禦倭兵未集而工部侍郎趙文華以禱海至文華素資緣大學士嵩貴幸頤指經經自以大臣位其上自重不爲下文華屢促出師經以兵機祕業已刻師期不告也文華遂劾經養寇并及天寵詔逮訊時經已與賊大戰王江涇破走之斬首千九百八十有奇進攻陸涇壩賊又敗之斬首二百七十有奇焚其舟三十餘艘倭大創經上疏自理不聽竟論死西市以周琬代經胡宗憲代天寵琬未幾去以楊宜代屬文華盛集兵戰于陶宅敗績遂還朝應天巡撫曹邦輔再戰再敗惟蘇松參政

任環戰稍捷賊別部自日照登掠贛榆自上虞登掠高埠皆不滿百人官兵莫能禦高埠賊轉掠浙西南直破南陵溧水橫行數千里殺傷無算至蘇州乃滅諸將大猷等逐賊海上頗有斬獲而閩廣倭大至三十五年楊宜罷去宗憲代阮鶚代宗憲文華復出督師時浙賊惟陳東最強徐海後至與之合參將宗禮率所部河朔兵九百人與戰于崇德三遇三克追躪橋橋陷兵潰禮死之賊進圍鶚于桐鄉鶚固守不能拔乃解去而宗憲欲構二賊乃遣人至海所若爲好語者東疑之宗憲則厚賂海使執東自贖海許諾卽計擒東及其黨麻葉等百餘人以獻而自率其衆別營梁莊官兵遂圍東巢盡殲其餘黨進攻海于梁莊海死別部據舟山俞大猷攻之未下會夜大雪大猷督兵進賊拒戰敗歸巢擁柵自固我兵縱火焚之斬

首百四十餘級餘悉死巢中兩浙平其明年誅王直王直者徽人也嘯逋海上能號召諸夷治大舶巢五島中奸商王濬葉宗滿謝和王清溪等共集衆與相署置倭之來皆直等導之宗憲欲招之乃迎其母妻至杭供具犒慰甚厚而先是鄞生員蔣洲者上書督府言能說直使禁戢諸夷毋內犯宗憲遣洲行以生員陳可願副之至五島直邀入爲言日本方亂往無爲也誠令我輩得自歸無難倭矣遂遣養子毛臣同可願還具白直語而傳送洲至豐後島其島主留洲稍爲傳諭諸島居二歲乃遣僧德陽及夷目四十人隨洲來入貢直亦許俱至而宗憲亦遣毛臣歸報直所以遊說百端至是直乃來御史王本固疏言不宜招直異議闐然直至覺有異乃先遣王濬入見宗憲曰吾等奉招而來謂宜信使遠迎宴犒交至也今行

李不通而兵陳儼然公毋誑我乎宗憲曰國法宜爾毋我虞也與約誓堅苦直終不信曰果爾可遣激歸宗憲立遣之復以指揮夏正爲質直乃使毛臣王激守舟而身入見頓首言死罪且陳其與洲戮力狀宗憲慰藉甚至今居獄中俟命疏聞詔誅直始宗憲本無意殺直以本固爭之強議者且謂其受直金欲貸其死故宗憲懼不敢爲請直死王激毛臣殺夏正率餘衆據舟山征之踰年乃解三十八年倭寇江北分數道入巡撫李遂馳至如臯與賊遇白蒲諸將言宜及其未定擊之遂曰夫戰貴得地賊方銳而我軍未嘗見大敵卽小挫難復矣約勒軍中毋得言戰賊益進遂策曰賊分道入過如臯必且合合則道有三自泰州逼天長鳳泗卽皇陵驚最要自黃橋逼瓜儀搖南都而梗漕次之若從富安而東海濱荒涼擄掠無

所得至廟灣絕矣乃吾得地時也於是部諸將防遏令毋得過天長瓜儀而分兵綴賊後賊果走廟灣遂欲以策困之通政唐順之以視師至促戰斬獲甚衆順之會有他役釋去遂益合兵攻圍賊困甚欲遁副使劉景韶督兵焚其舟賊救舟我兵水陸攻之大潰斬首八百餘級江北倭悉平其寇福建者張甚連攻破寧德福清永福諸邑巡撫阮鶚罷去王詢劉燾游震得相繼撫閩無尺寸功宗憲檄參將戚繼光往援時賊據寧德之橫嶼阻水爲營路險隘官軍坐守踰年莫敢進繼光軍令嚴所部用命至則令軍中人持束草填河進力戰大破之生擒九十餘人斬首二千六百餘級焚溺死者無算奪所擄三千七百餘人歸乘勝勦福清牛田倭又破之繼光初至福清邑令及父老請師期繼光曰吾兵疲且休矣俟緩圖之賊偵

者歸告不爲備其夜督兵行三十里黎明破其巢邑人尙未知兵出也繼光歸賊復肆四十一年攻陷興化總兵劉顯去賊一舍而軍不敢戰復命繼光往時賊方巢平海聞繼光至欲逃爲俞大猷所扼不得出繼光督軍薄戰大猷繼之因風縱火賊皆糜巢中無脫者支黨寇仙遊連江諸處盡討平之當是時微繼光幾無閩未幾廣東倭亦爲官軍所敗逃至甲子門將奪舟入海暴風盡溺得脫者僅二千餘留屯海豐俞大猷就圍之賊食盡欲走副總兵湯克寬伏兵待之賊至伏發擒斬幾盡倭患遂息自東南中倭以來十餘年間中外騷擾財力俱訕生靈之塗炭已極倭亦大傷至盡島不返隆慶時海上逋寇曾一本等復稍稍勾引入犯閩粵我亦嚴爲備旋至旋撲非如嘉靖之季矣始倭盛時議者以市舶罷夷無所衣食故

反宜開市如諸番參將大猷以爲倭與諸番不同諸番產物多舶至而征之其利厚倭之市僅一刀一扇無他產可利也而又生禍端國初絕之今忍開之乎且倭能苦我者以我陸而禦之主客反而勝敗分也吾以海爲塹以舟爲家明風候嚴約束來擊去追倭可創矣舍此不圖而輕與之市爲國家生事後必悔之大猷習海上事後多用其畫其地北跨朝鮮南盡閩浙其往朝鮮也自對馬島開洋信宿至閩浙順風旬月至其主居山城故稱山城君山城之南爲和泉又南爲沙界沙界之東南爲紀伊紀伊之西爲伊勢山城之西爲丹渡左爲攝津左之西爲攝摩右爲但馬右之西爲因幡丹渡西爲美作左爲備前左之西爲備中右爲因幡右之西爲伯耆美作之西爲備後之北境出雲之南境備後之西爲安藝出雲之西爲

石見安藝石見之西爲山口谷國卽古之周防州也山口之西爲長門關渡在焉渡此而西爲豐前其南爲豐後又其南爲日向豐前之西北爲筑前西南爲筑後筑後之南爲大隅大隅之西爲薩摩豐後東南懸海爲土佐爲伊豫爲阿波阿波相近懸海爲炎路土佐豐後之間爲佐加關薩摩之北爲肥後又其北爲肥前肥前西懸海爲平戶平戶之西爲五島北爲多藝爲伊岐極北則對馬島諸島皆有酋長山城君弱空名耳倭不稟其號令內相攻強則役屬而豐後最大其入貢必由博多歷五島而行回則徑趨長門每歲清明後至五月重陽後至十月常多東北風利入寇故防海者以三四五月爲大汛九十月爲小汛其入寇多薩摩肥後長門三州人次則大隅筑前筑後博多日向豐前豐後和泉諸島俗喜盜輕生好殺

每戰必單列緩步爲蝴蝶陣前一人揮白扇爲進止木弓竹矢以骨爲簇刀極剛利中國不及也男子魁頭斷髮黥面文身婦人披髮跣足閒用屨土氣溫煥宜禾稻桑麻產金銀琥珀水晶硫黃水銀銅錢白珠青玉蘇木胡椒細絹花布漆器扇刀劍鎧甲貢道故由寧波達于京

論曰四夷爲中國患從來久矣而皆殷於西北狡然島夷狂逞肆噬則明興實甚豈盛衰之數亦遞乘歟夫以高皇帝之威靈北暢南洽獨倭馭之而不馴綏之而愈貳此其不可以禮義化誨懷服視諸夷爲特甚矣東甌江夏僂力經營保障之具犁然畢舉廣寧一戰威震殊俗赳赳虎臣于今爲烈矣顧鉅防隳于平世疆事弊于匪人東南之禍其亦有必然者也重以匪茹罔懲包荒太甚郊關弛禁虎兕狎遊遂令貢使內訌姦氓外市紛

紜糾結干戈日尋毒流海內十載不休祖訓之嚴於絕倭淵乎卓哉真萬世之龜鑑矣

安南考

安南唐虞時南交也秦爲象郡漢初南越趙陀據之武帝平南越置交趾九真日南三郡光武時女子徵側徵貳反馬援討平之建安中改爲交州置牧唐置都護府改爲安南五代時土豪曲承美據之已爲南漢所併宋初丁璉有其地封交趾郡王自是棄爲夷璉傳弟璿黎桓篡之桓傳子龍挺李公蘊篡之公蘊八傳嗣絕爲其壻陳日昷所有元攻下之封其子光島爲交趾郡王終元世貢不絕亦時時侵掠邊郡不敢大爲寇國朝洪武二年國王陳日燿遣使同時敏等來朝貢上命侍讀學士張以寧典簿牛

諒齋詔封日燧爲安南國王給鍍金銀印未至日燧卒姪日燧嗣請詔印于以寧拒之吾受命封先王何以得擅予若日燧請于朝乃遣編修王濂主事林唐臣封日燧嗣王而嗟賞以寧得使臣體日燧拜詔甚恭未幾爲陳叔明所篡叔明老弟熾代視事熾攻占城敗死弟煒代先是上嘗戒安南占城毋相攻至是以叔明兄弟怙強速禍復遣使諭之叔明表謝連歲貧上厭其數令三年一貢毋侈方物進犀象以勞吾民二十一年黎季犛弑煒立叔明子日焜命絕其貢叔明八年死上以叔明身自爲篡勅禮臣毋弔而遣行人陳誠呂讓諭還所侵思明五縣不聽日焜旋亦爲季犛所弑季犛大誅殺陳氏更姓名曰胡一元子蒼曰胡奩僭號紀元國曰大虞永樂元年表言陳氏世絕奩爲陳甥求署國事從之已真封爲王會陳氏

故臣裴柏耆走闕下乞師而老撾亦傳送故王孫陳天平來朝安南使者見天平多泣下詔詰季犁季犁詭請迎天平歸還以國天平行命都督黃中呂毅率兵五千送之季犁遣使迎具牛酒犒師偵騎往壺觴道相屬也不爲虞行至芹站伏發殺天平及大理卿薛崑中等引還上大怒以成國公朱能爲征夷將軍率新城侯張輔西平侯沐晟等二十五將軍出廣西雲南兩道討季犁而以尙書劉儁督師尙書黃福大理寺卿陳洽督餉親幸龍江禱祭戒諸將毋縱吏士暴掠毋輕進貪功罪人得則歸國陳氏擇立其子孫能行至龍州卒輔進破隘留雞陵等關傳檄數黎賊二十罪師次新福縣晟亦自雲南至白鶴江遣人與輔會上命輔盡護諸將兵代能時賊恃宣洮富良諸江爲固緣江樹柵立椿別築土城備禦甚嚴欲老我

師輔晟合攻之下令軍中丈夫報國立功在此時矣先登者賞不次士皆奮銜枚舁攻具薄城裨將蔡福先登衆繼之舉火城上銅角齊鳴賊披靡退驅象巷戰遊擊將軍朱廣以畫獅蒙馬神機銃翼而前象奔賊大潰斬獲及蹈藉死者無算進克東西都城焚城遁連戰萬劫江木丸江悶海口皆大破之諸郡邑相繼降附輔徧宣上意令安業隨窮追季犁父子于奇羅海口都督柳升以舟師會悉擒之安南平得戶三百一十二萬象馬牛羊舟糧器械無算捷聞詔求陳氏後無存者父老合辭請郡縣視內地乃置交趾都指揮布政按察三司府十七州四十七縣一百五十七衛十一所三市舶司一以尙書福總布按二司事勅輔求交趾有能學藝者舉以聞六年輔振旅還論功進輔英國公晟黔國公升安遠伯餘陞賞有差已

交人簡定反命晟討之僞復督師晟戰敗績僞及都督呂毅參政劉昱皆沒賊黨陳季擴鄧宗異等益猖獗乃命輔往輔率諸將敗賊鹹子關又敗之太平海口追至清化殲其黨季擴自言我陳王後也請立不許請降許之以爲交趾右布政使輔歸復反竟復遣輔轉戰連年賊乃獲自輔之下交南凡三擒僞王威震西南夷中途留鎮其地而尙書福有威惠交人懷之弭伏莫敢動十五年召輔還以豐城侯李彬代久之福亦歸尙書陳洽代時中官馬騏墨而殘交人怨之三年之間叛者四五起彬先後討敗之而黎利最劇連結老撾出沒縱橫彬不能制詔以爲清化知府利許諾然竟不赴而攻劫日甚先後破茶籠州諒山府茶籠守琴彭諒山守易先皆堅守力盡俱死之洽力言利詐宜亟誅而中官山壽持撫議甚堅擁兵自

衛諸將陳智方政復不相能彼此牽掣師遂敗事聞章皇帝下璽書切責而以成山侯王通總兵討賊通戰寧橋中伏大敗尙書洽死之已敗賊交趾城下殺萬餘人諸將請乘勝蹙賊通不從賊知通怯益聚衆肆掠攻昌江城守將李任顧福日夜拒戰焚其攻具賊益起土山以飛鎗射城中任福率敢死士夜開門殺守土山者襲破其營賊爲地道入鑿橫溝應之從溝中發石擊殺賊甚多賊恐大軍至據其城攻圍不休相拒九閱月城中將士三千餘人至是亡其半力竭不能支城遂陷任福皆自刎死中官馮智北向再拜誓不從賊與指揮劉順知府劉子輔俱自經死軍民感其義同死者甚衆上遣安遠侯升黔國公晟分道往援以尙書李慶督師升剽而輕旣連勝易賊慶言宜少戒升不聽竟中伏死慶及副總兵梁銘相繼

病沒參將崔聚率兵進至昌江賊大驅象而前軍亂聚被擒時尙書福在行交人得福環跪泣公在我曹不至此競送之歸而晟兵竟不出通懼大賂遺利與盟而旋師按察使楊時習爭之強不聽羣臣劾通并馬騏下詔獄論死通後竟脫利表言前國王遺嗣暠今在老撾請嗣封上集大臣議英國公臣輔尙書臣義臣原吉皆言交南本中國地勞苦而得之不宜墮成功示賊以弱大學士臣士奇臣榮頓首言兵興以來天下無寧歲今瘡痍未起而復勤之臣不忍聞且求立陳後者太宗皇帝心也求之不得而後郡縣叛亂相尋至深厯先帝憂今因其請撫而建之以息吾民於計大便宜漢棄珠崖前史榮之安在爲示弱乎上曰卿二人言是先帝指朕固知之明日出暠表諭羣臣朕以止戈爲武卽議者未同無庸恤羣臣頓首稱

善於是命禮部侍郎李琦工部侍郎羅汝敬齎詔召安南文武吏士皆來歸并覈陳氏後當立者以聞利遣頭目黎公俱等送還官吏百五十七人戍卒萬五千一百七十人馬千二百匹其陷沒不得歸者無算且言鬻死陳氏種絕上心知其妄然業置之乃詔利權署安南國事八年利死子麟代之正統初以麟事朝廷恭詔封爲安南國王諭令還所侵欽州地及逋民二百餘戶麟卒子濬嗣遣兵攻占城執其王摩訶賁該以歸詔歸其王不聽濬爲庶兄琮所弑弟灝嗣輒侵我土司地攻殺老撾宣慰使刀板雅蘭掌父子爲八百敗歸累詔戒諭之灝驚橫自如屢攻占城併其國我無以禁而中官錢能鎮雲南復私與灝通闌結諸夷姦宄繹騷幾危雲南賴巡撫王恕發其姦亂乃弭弘治十年灝死子暉嗣使者入貢乞改所賜常

服從王制不許十七年暉卒弟誼嗣阮种弒之立灝庶子暲暲孱甚政在羣下盜起國亂正德十一年陳暲弒暲自立莫登庸逐暲立暲兄子諱專其國暲奔據諒山死諱迫於登庸奔清化庶弟應立交人云應登庸子也無何死登庸遂竊安南王其子方瀛諱竟死清化故臣共立諱子寧居木州漆馬江倚老搗爲援嘉靖十六年寧遣鄭惟僚來乞師上以登庸弒逆又久不庭當誅議討之以咸寧侯仇鸞爲帥尙書毛伯溫督師伯溫至廣區畫諸便宜爲進兵計廣守臣多難之且謂莫之篡黎猶黎之篡陳先後事同不足誅登庸亦遣人自歸廷議未決伯溫駐師境上檄諭交人懸重賞購登庸父子懼請束身待罪歸欽州四峒故地世世奉職貢乃於鎮南關築壇具儀登庸率其屬繫頸徒跣北面匍匐上表降伯溫承制受之詔

赦登庸歸廢勿王以爲安南都統使世其職仍覈黎寧果黎後則畀以所據地否則已制下登庸已死授其孫福海二十六年福海死子宏瀛幼阮如桂等擁立之族人莫正中欲爲亂不克來奔三十年命宏瀛嗣四十二年貢使黎光賁至京光賁以國難羈留南寧者十五年至是乃達其後貢遂絕萬曆閒莫茂洽爲都統使茂洽死國大亂數年鄭惟憭子鄭檢立黎暉後黎維邦爲主維邦死檢子松復立維邦子維潭嗣盡逐莫氏遺孽莫敬用竄居高平府敬璋敬恭竄居東海府保樂州復內相讐未幾敬璋爲黎兵所殺維潭遣使浮海詣督臣歸罪請款關輸貢移文擅用前國王印守臣詰之維潭飾辭對然請款愈堅因與約必以高平居莫氏如黎氏漆馬江故事維潭心難之業爲期啓關有日矣遂遁去頃之復款具言其恢

復之義歸附之誠第謂高平乃其故土且莫氏篡臣不宜以漆馬江爲比守臣曰莫氏在先世雖爲篡逆今日乃國家之外臣也爾安得滅之以彼奔敗之餘使得假息一隅毋遽殄絕是我國家所以鎮撫四夷共其患難之意也且彼此分定我諸土司亦毋敢黨亂以遺爾憂于爾豈不利焉而愛此尺寸之地爲維潭乃聽二十四年夏四月築壇具儀受其降具如登庸故事督臣陳大科疏聞因盛言莫之篡黎其事逆先朝猶赦其愆況黎之復讎其名正今日宜許其順以夷治夷祖宗成法事下兵部議如大科言詔以維潭爲都統使予莫敬用以高平令維潭毋得侵害安南復定其地東至海西至老撾南接占城北連思明衡二千八百里縱一千七百里夷獠雜居獷悍喜鬪其君長尤狡獪有二名以僞名事中國自黎氏以來

雖奉貢稱藩然自帝其國中如趙佗故事死則加僞諡黎暕之弒或云鄭惟鏞爲之陳暲討惟鏞而僭焉者也諛者惟鏞所立也鄭宗強亡黎者鄭也登庸乘亂而竊其柄者也寧者非真諛子也傳聞厯不得而詰矣其俗惟交愛人倜儻驩演人淳秀有華風文學則驩演爲盛其山川佛跡勾漏傘圓富良江宣光江爲大產金珠珊瑚瑋瑁丹砂諸香蘇合油胡椒羚羊角犀角兕白鹿猩猩狒狒白雉翡翠蚺蛇蟻子鹽醢波羅密菴羅果烏木蘇木

論曰安南自宋以前雖內屬然叛亂代有固南服之外疆也季黎之討彼惡已盈寧席中國廣大輕用武哉掃氛驅孽還我舊封皇靈暢矣而銅墨朝頒羽書夕至元戎三遣旋戢旋焚昆明百粵之區戈船下瀨之士騷擾

相奉困敝已極國家會不得其尺縷斗粟之用幡然舍旃與之更始兵革不興版章無損豈非繼述之善而明聖之所圖歟維時反側初安刑餘肆毒官徇苟且之政將乏折衝之才遂啓戎心卒隳成業故談者有遺論焉黎莫相殘盛衰迭禪程凶較逆無所等差然皆先後輸誠叩關請命王封永削國體彌尊威已加矣然後驛之操縱有宜抑亦參伍于前事也昔成化時闡直倖功數從中問所司征安南故籍劉忠宣匿不與事乃中寢嗚乎茲蓋臣之用心哉

女直考

女直古肅慎氏在混同江東東濱海西接兀良哈南鄰朝鮮漢爲挹婁元魏爲勿吉唐爲黑水靺鞨其部落曰女真金祖也後避遼諱曰女直元滅

金以其地置軍民萬戶府五國朝分爲數種居海西者曰海西女直居建州毛憐諸處者曰建州女直極東最遠者曰野人女直又諸小種甚多皆勇悍善射耐饑渴喜戰鬪建州居中爲雄長地最要害其人知耕種緝紡居處飲食頗有華風永樂元年野人酋長來朝已悉境歸附先後置建州等衛一百八十四兀者等所二十都司一曰奴兒干官其西爲都督都指揮千百戶鎮撫俾統其部落別爲站爲地面各七不領于衛所並約歲一朝貢野人遠無常期已又開馬市開原城設安樂自在二州居降夷終文皇帝世諸夷奉職謹徵發惟命我亦厚賞賜金帛以結其心諸來朝及款邊通市者悉聽而建州衛指揮阿哈出及其子釋家奴皆以有功賜姓名阿哈出曰李思誠釋家奴曰李顯忠顯忠弟猛哥不花亦以內附故俾領

毛憐衛累都督同知父子兄弟光寵矣顯忠死子滿住嗣猛哥不花死子撒滿答失里嗣宣德四年滿住請入朝充宿衛不許其年海西野人女直數寇邊都督巫凱請討之上不欲勒兵第賜勅戒諭仍令凱厚恤入貢諸夷毋苛留正統初建州左衛都督猛可帖木兒爲七姓野人所殺弟凡察子童倉逃居朝鮮童倉弟董山嗣爲建州衛指揮亡何凡察童倉歸建州數與朝鮮相告言語在朝鮮傳中方七姓之難建州亡其印詔更給比後得故印詔上更給者凡察匿不出乃更分建州左衛置右衛剖二印使董山領左凡察領右正統末北虜數煽誘諸夷與窺邊滿住董山等咸耳目虜入寇不絕殺掠遼東吏民無算景泰中巡撫王翱遣指揮王武經歷佟往招之稍歸所掠而身自入謝然是時諸酋多死子孫以從亂故盡失其

賜勅不得官以舍人入貢賞賜大減恨恨也成化二年都御史李秉言建州毛憐諸部來朝貢邊臣以禮部定名數驗方物貂皮純黑馬臚壯始聽不則拒之殊非厚往薄來中國所以待夷狄之意請更其制下兵部議如秉言而董山糾毛憐海西夷入盜邊無虛月遣都督武忠往諭并勅考郎兀諸酋撒哈良等毋黨叛皆頓首謝董山亦悔走闕下自歸責而遣之然暴橫自如語言不遜詔羈之廣寧尋誅之以武靖伯趙輔爲靖虜將軍都御史秉督師討之分三道入搗其巢朝鮮亦發兵遏其東走輔斬首虜多滿住死明年築撫順清河靉陽諸堡邊備日嚴夷稍稍創而朝廷亦欲羈縻之勿絕復以董山子脫羅爲指揮滿住凡察後皆得襲諸從叛者視先世遞貶一官諸夷復貢然往往以報董山讎爲辭患苦塞上巡撫陳鉞不

能禁輒襲殺降夷以捷聞時大闡汪直方倖功鉞揣其意疏言建州夷連結海西請討之而通事王英者復說直是可乘也毋爲他人功直銳甚請行詔以兵部左侍郎馬文升經略之直亦繼往文升至則具言夷所以叛無他端起于二三酋豪失職怨望及貢使苦關吏求索相挺爲亂耳宜嚴罰吏而稍寬夷使自新可不煩兵服也直心害文升而文升遇直無詘禮鉞復構之遂劾繫文升謫戍蜀時諸夷業已聽撫有次第會文升去鉞遽言夷酋伏當加修怨怙亂不誅無以示警乃遣直行而以撫寧侯朱永爲帥襲破之頗有斬獲道遇貢使哈速郎禿等以爲賊捕送京師誅哈速等五人竄郎禿等七十餘人論功進永保國公鉞右都御史直歲增米三十六石諸將校陞賞有差而夷大忿怨益深入殺掠焚劫慘于往時矣御史

強珙暴其狀旋爲直陷謫戍邊遼事益壞守臣苦用兵思復親夷會其酋完者禿貢馬乞入謝請于朝許之自是諸衛復奉貢請襲如故少入寇塞上稍休至正德閒海西夷加哈又竹孔革等爲亂阻絕朝貢旋撫諭解散嘉靖初夷酋速黑忒最強諸部畏之入貢亦最恭以捕殺叛夷猛克功賜綵幣金帶大帽獎慰之以風勵諸夷其後請乞煩大率以詐冒得官入貢浮于常額乃從兵部議勅遼東守臣夷來必嚴覈如制方啓關否毋納二十一年建州夷李撒赤哈等入寇巡撫孫禴禦之失亡多頃之於敖爲巡撫坐減賞物夷人譁不能定願詐殺譁者夷挾忿數入塞殺掠如成化時復時時與虜合爲邊患撫臣連以不任罷去遼東西大困已復稍戢朝貢至今不絕其地有長白山橫亘千里高二百里巔有潭周八十里南流爲

鴨綠江北爲混同江險隘則五嶺喜昌石門夷視爲咽喉土氣極寒冬常
穴居喜馳獵上下巖壁如飛浮馬渡江河不用舟楫恃其獷捷故屢入寇
然貪惜官賞雖叛輒服焉產楛矢石砮赤玉眞珠金麻布鹽馬鯨睛膃肭
臍海東青鷹鷂鴉鵲兔鵬牛魚粟麥稌葵菜及貂鼠青鼠虎羆狐狸海中
豹驢獾牛狗猪諸皮貢以冬月爲期非期者邊臣具請其陞襲以頒給勅
書爲驗久稍濫嘉靖雖禁不能盡覈也

論曰女直之興微矣極其勢至於亡遼蹙宋基中國大禍患生於所忽蓋
謂茲歟勝國驅除明興豢養稍馴狎矣彼其屋居耕食分地世官非專事
射獵遷徙無常如匈奴比故可得而羈縻蓄也獸奔豕突夷性則然而此
叛彼歸朝侵暮款信使一臨扣關相望假令恩威足服其心而擾馴毋失

其宜一疆吏辦之矣。顧夸者徼之以爲功，貪者漁之以爲利，自我致寇，亦復何尤？夫以馬端肅之經畫，夷方悔禍，勞之不圖，而反爲罪首，卒使奄豎快心，邊陲飲痛，謀國如此，以制夷撻虜，能哉！

朶顏三衛考

三衛在大寧都司北，曰朶顏、福餘、泰寧。其地在春秋爲山戎，秦爲遼西郡，北境爲奚、契丹所據。東漢征敗之，其酋走匿松漠間。後魏之先復居故地，號庫莫奚。後屬契丹，名兀良哈，今猶仍其稱。元卽奚都地，置大寧千戶所。國初置行都司及營州等衛。洪武十四年，封子權爲寧王，守北藩。時宋國公馮勝征納哈出，上諭令據大寧塞，分兵列戍以控制之。至出內帑鈔募民，輓粟餉軍，勝遂築大寧、寬河、會州、富峪四城，每師出輒留重兵爲守，卒

破降納哈出二十一年故元宗室遼王阿里失禮及朶顏諸酋奏願內附
詔立三衛以居自錦義歷廣寧至洮河爲泰寧衛以阿里失禮爲指揮使
塔賓帖木兒爲同知自黃泥窪踰瀋陽鐵嶺至開原爲福餘衛以海撒男
答爲指揮同知自全寧抵喜峰近宣府爲朶顏衛以脫魯忽察兒爲指揮
同知各領部落爲外藩畜牧遷徙從其俗靖難兵起先襲破大寧盡拔諸
軍及三衛胡騎挾寧王入松亭關事平詔三衛奉職如高皇帝時盡官其
酋與約歲再貢衛毋過百人其後屢告饑許以馬易糧小小入犯璽書詰
責許以馬贖罪比馬至復償以布其易糧者上馬至十五石絹三疋邊爲
之困後乃以都督劉江議裁馬直半給布絹是時寧王徙藩江西都司及
諸衛皆遷內郡大寧地虛三衛因竊據出沒塞下外暱就中國而內通虜

永樂二十年上北征阿魯台曰虜恃兀良哈耳必剪兀良哈乃簡步騎五萬令諸將分五道往而身率兵邀其西走五軍會兀良哈果驅馬牛羊車輜西走陷澤中上麾兵蹙之斬首數百級相蹂躪死者甚衆已乘高望見寇衆復聚乃分左右翼夾擊而令甲士持神機銃入深林中爲覆曰寇至乃發已寇突而左右師馳之走林中林中伏卒起虜驚走渡河大潰死傷略盡餘數百人躍馬走上曰此虜酋所居疾擊之追奔三十里蕩其巢而還三衛自是創復稍稍自歸上亦貫其罪待如初昭皇帝立更給福餘衛印并釋前所虜部酋帖格歹從指揮安出請也章皇帝初貢不時至邊將請討之詔飭部伍防守而已毋輕議兵宣德三年秋上大閱行巡邊駐蹕石門守將奏兀良哈萬衆侵邊已入大寧經會州將及寬河諸將咸欲擊

之或請益徵兵上曰擊虜無能爲也朕以鐵騎三千出其不意擒必矣遂決親征下令選士三千人人二騎持十日糧夜銜枚出喜峰口馳四十里味爽至寬河距虜營二十里虜望見我軍以爲乘障卒易與悉衆來戰上中分其騎爲兩翼親射其前鋒三人殪之兩翼矢如注繼神機銃疊發虜大潰走上以數百騎追之虜望見黃龍旗知上親在也悉下馬羅拜生縛之斬其酋命諸將搜山谷務窮虜巢忠勇王金忠者故韃靼名王子也及其甥都督把台請自効上從之或言虜其類也往必不反上不聽竟遣之忠與把台果大獲虜人馬牛羊數百至上命酒賜以金爵顧謂侍臣王者用人宜誠如朕昨懷疑聽人言將失二人心或言夷族叵測上曰漢用金日磾何不可耶時天子神武閑於兵士馬精強所任皆効力故一戰大克

六年詔諭三衛蠲其罪使自新其明年更給泰寧衛印以舊印奪于虜而福餘印亦以虜再失至正統元年再給睿皇帝初三衛復通虜酋脫懽及女直伺塞下屢詔戒諭之三年春三衛酋阿魯歹等以五百騎掠葭州爲邊兵破歸獨石守將楊洪邀之西涼亭生擒百戶乞麻里等奪所掠上命集兀良哈使臣於市戮示之隨諭都指揮安出等近邊臣屢擒盜邊者訊之皆爾部人爾其縛首惡來獻毋匿叛安出使指揮伯都哈孩等入貢具言其人已遠遁無從捕再勅索之其明年夏三衛酋歹都等言賞薄互市失利非文皇帝故事上因其使陞辭勅諭歹都文皇帝以爾通阿魯台歲徵爾馬三千匹贖罪爾俛首聽命朕實爾寬而妄意無厭是速敗也其亟改圖不者將貽悔其秋楊洪復破其五百騎于白塔兒璽書褒洪五年使

者易農具歸關吏阻之其酋以爲言詔聽歸其明年福餘所部脫火赤完哈等以射獵爲名掠邊關被擒其明年復掠遼東守將曹義擒其酋孛台皆命磔于市其明年虜酋脫懽死子也先嗣益驚橫屢犯塞朶顏乘是愈擾邊然多不過百餘騎明年秋三衛乃並入寇命成國公朱勇率諸軍分道出喜峰口諸處都督同知楊洪出黑山東西齊舉並擊兀良哈勇等渡柳河經大小興州過神樹至全寧遇福餘逆戰敗之次虎頭山及流沙遇泰寧朶顏又敗之洪至克列蘇俘斬安出部賊各奏功自是三衛寢衰然怨我刻骨因通也先導之入寇矣而其朝貢中國如故安出歹都言女直來侵且修怨詔戒止之亦時時以瓦刺暴掠聞輒賜勅存慰許急則避居近邊十二年春都御史王翱同總兵曹義巡塞外至廣寧兀良哈伏林中

義圍擊敗之別將胡源出開原集禮出寧遠各有斬獲褒賞鞞等有差十四年福餘泰寧結也先入寇朶顏獨扼險不肯從虜不得利大掠二衛人畜去二衛益衰而朶顏獨強盛竟與虜合我是以有土木之變嗣後三衛入貢往往雜入北虜使中窺我遇北使厚心不能無望且以我虞虜也故常挾虜爲重以結婚迤北聳邊吏盡沒遼河東西三岔河北故地薊遼從此奢奢多事矣景泰三年三衛遣人言也先將以冬月住哈刺莽來召衛酋往議事兵部尙書謙議也先貢使絕而三衛使遞至疑爲虜閒宜令邊臣嚴爲備因條上防禦諸事詔從之五年泰寧都督僉事革干帖木兒上書乞大寧廢城及甲盾謙復持不可帝心難予城又重絕三衛權乃用廷臣議遣譯者語之大寧城迫近塞不便射獵又炎暑恐生疾疫非所宜居

其去塞二百里住牧毋犯邊吏約甲盾不爾吝寇至則給其明年革干帖木兒及朶顏諸酋來朝乞犁鏵種糧及耕地自給詔予糧三十石其明年入邊參政葉盛督軍破走之天順三年虜酋孛來謀掠三衛詔諭革干帖木兒使修備緩急來告隨晉革干帖木兒爲左都督其明年革干帖木兒死弟兀斡帖木兒代領衆部落不附乃從朶顏都督朶羅干請以其子脫脫孛羅爲都督僉事領父職是時三衛多與孛來通貢使浮常額故事貢道由喜峰口景泰末已闌從獨石萬全右衛入至是乃隨孛來使者俱入雲中邀厚賞我待之如故仍戒邊臣毋盡納至成化元年孛來爲請賞結三衛心詔諭孛來國家待四夷輕重有等成憲具存三衛違貢道舍東而西無誅爲幸其又何厚焉其年復犯邊遣都督季鐸往諭至泰寧而還兵

部劾鐸奉使無狀請逮治詔貸之泰寧衛酋隨請于塞下市牛及農具并乞蟒衣制勿與蟒其他聽與民交易其明年詔虜使毋通朶顏已又戒邊臣備朶顏通虜五年詔三衛常貢外毋進海青兒鶻其後屢以馬市請兵部持不可至十四年命兵部侍郎馬文升和輯女直三衛而通事百戶王英熾幸奄汪直使攘文升功三衛乘閒申前請且欲改貢道從開原復以兵部議格而三衛亦要素無已時大抵自天順後北虜諸酋反覆相殘蹂並陰結三衛伺我然亦不敢大爲寇而總兵梁銘頗以威名著弘治二年請增貢不許其後小小入邊或絕貢我輒嚴備至十年守臣張瓊楊友出塞燒荒掩殺邊蠻遂起十七年朶顏通小王子入寇上御煖閣召輔臣議語在北虜傳時朶顏部落益蕃累侵盜而諸部花當爲貴種花當次子把

兒孫恃驍勇敢深入益爲中國患正德四年泰寧酋滿蠻率部落二萬餘欲附居塞下避北虜守臣以聞兵部議許居故鎮安堡第戒邊臣毋縱虜內蹂從之其後花當累請增貢且謂不得請則絕貢詔暫增今歲後如故而花當請益堅我不能從乃遂通小王子部落自鮎魚關毀垣入殺參將陳乾及指揮談茂馬英等遣都督桂勇討之兵尙書王瓊建議諭花當必以把兒孫償乾乃罷兵許貢花當言把兒孫已遠遁請入馬贖殺乾罪瓊初持議堅後竟許花當貢班師未幾復入寇參將魏祥全軍沒終正德世不能討肅皇帝立都御史孟春言把兒孫修貢謹又歸我人畜請予一秩詔予千戶給事中許復禮謂不宜予事乃格是時把兒孫與小王子婚屢誘虜入寇都督馬永禦之頗有斬獲孟春復請毋惜一官以餌虜御史盧

瓊疏罷之未幾把兒孫死革蘭台爲都督革蘭台父革列孛羅花當長子也早死把兒孫狡悍謀奪嫡然種人不附附革蘭台至是乃得襲時嘉靖十年也革蘭台立隨入寇漁陽諸小關皆殘破撫臣王大用頗有遠略欲厚賂城其霧靈山不果革蘭台又乞晉秩大用持不可屬虜酋阿堆哈利赤數殺掠建昌喜峯口太平諸塞御史連疏詆大用啓釁奪其官虜益張邊廢耕牧而朶顏亦益輕我二十年革蘭台遂復求增貢不許時時暴塞下輒云結小王子旦夕入寇會虜自雲中深入太原邊臣恐因曰山海關諸邊連歲無警亦是酋功也宜予賞詔從之其明年復誘虜犯青山口內詔以侍郎胡守中往勦撫守中儉嗜利盜內帑金多又擅出塞盡伐遼金以來松木百萬自撤藩籬徧索富人舊將領金錢言官劾守中論死西市

巡撫徐嵩以阿事守中削籍已有發嵩乾沒狀者逮謫戍其明年總兵卻永出塞襲李家莊斬四十級李家莊者朶顏別部也善盜邊然不通大虜亦能盜虜馬每往輒呼我戍卒曰吾往盜馬耳無我虞也狡而善射虜追之輒入險不能逼頗爲邊障是役後遂恨我往往合大虜爲梗而遼東塞亦以朶顏故連中虜我兵禦之互有勝敗二十七年革蘭台死子影克襲故事三衛酋皆以貢時身受職闕下至革蘭台父子乃遣人代請我不能詰頃之有庚戌之變虜時言遼陽軍導我來虜呼朶顏爲遼陽軍故云自是調邊兵入衛及移戍薊無虛歲三衛滋勾引莫誰何三十年咸寧侯仇鸞請征之樞臣趙錦督臣何棟議不可撤藩籬引寇自近事遂寢其年冬誅逆酋哈丹兒陳通事丹兒通事皆邊民爲夷酋幹堆板卜所獲更姓名

充貢使大爲虜謀先是虜謀犯京東舟兒爲言潮河川可入比逼古北口復傳虜西還誤我畿甸爲殘至是虜求開市舟兒煽構其間何棟計擒之始伏法其後楊博爲總督復購殺其首惡通漢夷稍戢三十八年虜把都兒十萬騎挾朶顏酋影克哈孩爲鄉導我謀多被殺虜遂潰牆深入督臣王忬誅死其明年影克勾把都兒犯一片石遊擊郭琥敗之四十二年糾東西虜二十萬由牆子嶺入大掠畿內督臣楊選誅死隆慶元年夷酋董忽力勾土蠻十萬入寇勢甚猖獗折牆出至棒捶崖迷失道墜坑死無算語具虜傳是後督臣譚綸總兵戚繼光協謀練兵增垣控制有方迄隆慶三衛奉職稍謹虜亦無大舉邊恃少安衛制首泰寧次福餘而朶顏末今朶顏盛故以爲首稱曰朶顏三衛云三衛皆勾虜而朶顏爲甚大抵夷性

喜偷剽善反覆虜衆至則逢之爲導而貪中國賜予燕撫厚亦時時以虜信告我得預防故迫之則毆使爲虜信之則墮其計善馭之則因用爲閒雖藩籬失而耳目猶在不能絕亦不可絕也其地東接海西西連開平北抵北海南達薊遼俗與韃靼同其山曰馬孟廣袤千里以中峰形似故名產馬橐駝黃牛青牛瑪瑙鵲樺皮白葡萄

論曰兀良哈之爲中國利害甚明也分闔建藩高皇之慮遠矣內徙于文皇非得已也干戈初戢障塞尙虛愛弟之請難裁征戍之勞在念權宜移置姑待後圖觀其次鳴鑿鎮有滅殘虜守大寧之諭彼何嘗遽割以資夷哉犁庭甫定榆木變興雄謨莫究遺憾可知章皇寬河之役威折奸萌假令乘勝長驅刈殘酋復舊疆善繼善述誰曰不宜顧上有雄略之主下無

謨遠之臣後且并開平而失之遂使要害藉于犬羊而宣遼隔若胡越禦
戎之策從茲絀焉夫西河套而東大寧失之皆我害也然河套猶明知其
奪于虜而時圖恢復乃大寧藉口于文皇職方氏遂視若三衛之固有無
敢談及故實莫稽而傳訛日甚可勝嘆哉

哈密考赤斤等衛附

國初畫嘉峪關以西先後置衛八曰哈密曰赤斤蒙古曰安定曰曲先曰
阿端曰罕東曰罕東左其先置後廢者曰沙州而哈密最西近土魯番去
肅州千五百里爲西域咽喉以故重凡諸夷入貢必哈密譯其文乃發其
地故漢伊吾廬唐西伊州元族屬威武王忽納失里居之後改封肅王卒
弟安克帖木兒嗣永樂元年遣使貢馬明年乞封詔仍爲王改稱忠順賜

金印其部落有回回畏兀兒哈刺灰三種皆領以都督統于王安克帖木兒立一年卒無嗣兒子脫脫先是俘蠻夷邸上厚撫之使嗣王設衛置官以華人周安爲長史劉行爲紀善駸駸視內藩矣未幾脫脫爲祖母速哥失里所逐詔還其王與祖母睦如初朝貢不絕然酒酒昏縱部下不附九年卒命都指揮哈刺哈納爲都督僉事守哈密是年封脫脫從弟免力帖木兒爲忠義王忠義王時哈密稍輯惟瓦刺一入寇忠義王以聞詔詰瓦刺旋解去宣德元年忠義王卒詔以脫脫子卜答失里嗣王仍稱忠順以幼故復立忠義王子脫歡帖木兒爲忠義王共理其國正統四年忠順王卒子哈力鎖魯壇嗣王別名倒瓦答失里嘗爲其母乞醫藥上嘉予之仍勅罕東諸衛還所掠哈密人畜無何瓦刺攻哈密劫王王母去詔詰瓦刺

歸王及王母哈密自是畏瓦剌稍貳于我璽書諭王朝廷樹立之恩于先世甚厚背德不祥慎母爲人所誑惑也然竟不悛益通虜拘留漢人因而轉賣者甚衆使者復暴橫至毆死護行軍校邊臣請絕其貢詔曲貸之天順元年倒瓦答失里卒弟卜列革嗣王乞朝服束帶母妻冠袍及兵器諸物詔下有司予王朝服母妻罽毼冠餘勿許隨以王母努温答失里請先後賜乘轎洗盆金箔茶香及諸藥物甚夥其後請以部人必刺牙失里爲國師上曰國師以優西僧之有戒行者難輕授其命爲都綱天順末卜列革卒世絕王母署國請以族人阿兒察嗣阿兒察辭乃命把塔木兒爲右都督守哈密把塔木兒者故忠義王脫歡帖木兒外孫也初王母以非族類不宜立而哈密酋母雜法兒等及國人請之堅故有是命把塔木兒死

子罕慎嗣爲都督成化九年土魯番強控弦可五萬其酋速檀阿力尤雄
黠速檀華言王也攻破哈密執王母及金印去罕慎竄居苦峪城甘肅守
臣以聞兵部議哈密我藩籬土魯番無故奪之此而不問則諸衛將盡爲
蠶食嘉峪之外皆敵疆矣必復之乃使都指揮詹昇諭赤斤蒙古諸衛以
輔車唇齒宜自爲計而遣都督同知李文右通政劉文討之至則調赤斤
罕東兵數千駐苦峪不敢進謬言阿力欲擣二衛虛還其兵使自守而身
自歸朝阿力遂輕中國益侵我內屬諸夷時遣使稱王母死還金印城池
以虛辭謾我十四年阿力死子阿黑麻稱速檀未壯守臣請乘閒納罕慎
哈密至十八年罕慎入哈密晉左都督罕慎貪殘失國人心西域諸貢使
苦要索有怨言弘治元年奸回誘阿黑麻使攻哈密阿黑麻亦壯乃曰罕

慎非脫脫族安得王王故應我因好語罕慎與結姻乘盟殺之遣使入貢
言罕慎病死請代王領西域職貢兵尙書馬文升議諸夷各有分地安得
相併兼夫以北虜之強我尙卻其款何物小酋欲與我媾且憫然王也格
不予而遣哈密部酋寫亦虎仙諭阿黑麻以金印歸擇所宜王文升謂夷
俗重種類且服元久非是族也不可使守乃行求忠順近屬安定王裔孫
陝巴爲王以奄克孛刺阿木郎輔之二酋輕重不相得陝巴空名耳無與
爲守阿黑麻乘閒攻殺阿木郎執陝巴去而以阿木郎奪賞物掠其牲畜
爲解事聞賜勅切責遣侍郎張海都督同知緱謙往經略之會土魯番使
來海請羈之肅州而再勅阿黑麻令歸陝巴廷議勅無爲也我愈褻而夷
愈重不如海自以檄往不聽則伺隙誅之或閉關絕之制在我矣通事王

英言罕東及野也乞里諸夷怨土魯番刺骨我撫而用之皆吾兵也西域使者方扣關倚互市爲利我聲阿黑麻罪謝西域毋與通彼窮而歸怨皆吾閒也如是則土魯番勢孤自保不暇烏能有哈密哉詔從廷議命海檄土魯番須陝巴歸貢乃許不則留前使毋遣而絕其後使仍以寫亦虎仙等爲都督轄三種夷奄克孛刺爲之長如罕慎故事海等不待詔遽歸下獄謫免阿黑麻遂自稱可汗略罕東諸衛聲取甘州于是戍其使四十餘人于兩廣而稍用王英策閉嘉峪關絕西域貢令怨阿黑麻是時阿黑麻已西去留其將牙蘭以四百騎據哈密文升計是可襲而虜也謂肅州撫夷指揮楊翥汝熟夷情策安出翥言罕東有徑路達哈密不旬日至襲之必以罕東兵爲鋒我兵繼之文升喜屬河西巡撫許進總兵劉寧使副將

彭清以三千騎往遲罕東兵不至乃循大路行乏水草騎不得馳牙蘭調知遁去兵入哈密獲陝巴妻女并牛羊三千宥脅從八百人我士馬亦多物故文升意大望違節制取空城無益不當賞獨軍士勞苦遠征當賞上念邊臣出師塞外功宜錄各陞賞有差而哈密夷衆久苦兵困甚不能支盡焚其廬舍內徙肅州先是奄克孛刺并種人亦寄居赤斤守臣并爲請居之苦峪給牛種耕牧自便奄克孛刺遣寫亦虎仙來貢請乞無厭至訐訴曹郎禮部尙書徐瓊疏逐之十年秋阿黑麻以絕貢失互市窘乞歸陝巴易故四十餘使貢如舊詔起前威寧伯王越帥諸路議還其使其明年陝巴歸復故封遣兵護之國以奄克孛刺寫亦虎仙等佐之奄克孛刺以兄罕慎故怨土魯番越復以罕慎女妻陝巴結其心稍稍立而陝巴嗜酒

培克部酋阿孛刺復構阿黑麻迎其次子真帖木兒爲王陝巴奔守臣令董傑諭阿孛刺還陝巴不聽傑與奄克孛刺等擒斬阿孛刺復其王送真帖木兒還土魯番時阿黑麻死諸兄讎殺真帖木兒懼不敢歸以母罕慎女也依奄克孛刺守臣恐與陝巴嫌使居甘州而其兄滿速兒稍定國亂自立矣正德元年陝巴卒子拜牙郎嗣滿速兒與通好上書求真帖木兒兵部議我方質其所愛不宜予六年議予之湯沐衣幣遣歸以都督寫亦虎仙滿刺哈三爲護行至則留不歸反以我情輸滿速兒導之侵我奄克孛刺以聞因具言拜牙郎欲叛中國從土番國且不守遂奔肅州頃之滿速兒逐拜牙郎使其將火者他只丁守之詔都御史彭澤督師往討時鄧璋爲總制給事御史言兩帥並置莫適任也宜罷遣不聽澤度滿速兒強

未易兵定乃以繒綺二千白金器皿入土魯番庭說令和好滿速兒喜許歸金印城池澤召還而拜牙郎尙爲所留我益幣索之卒不應滿速兒益驕日夜與寫亦虎仙牙木蘭等謀入犯縱騎蹂關外及苦峪諸城會滿速兒以他事怒寫亦虎仙將殺之火者他只丁爲解許至肅州歸幣千五百疋滿速兒喜釋弗誅遣入徵幣無有也遂復奪哈密城大入爲寇遊擊芮寧與戰死之亡七百騎賊迫肅州城下僞請和而陰約諸降夷及夷使爲內應兵備副使陳九疇廉得其情收繫捶殺之嬰城守而使使媾瓦刺達兵掠其巢滿速兒狼狽走我乘之頗有斬獲副總兵鄭廉及奄克孛刺再敗之瓜州滿速兒復請和巡撫都御史李昆以聞時方遣彭澤及中貴人張永往視師疏至罷行而滿速兒實無意和語張甚又竟不歸拜牙郎九

疇議夷兄弟方內競安能加我且俗無積聚師行則徵發煩擾未戰已先困矣我內地早收堅壁待之可坐破也宜絕其使勿通都御史昆議異謂不宜絕請上裁兵尙書王瓊右昆議從之瓊雅欲修郟彭澤又心害九疇能日媒孽西北事奸夷覘知本兵指又度天子多嬖臣可賄中則相與關通上書訟九疇激變邊先後并諸守臣逮下獄澤奪官昆謫參政議殺九疇戶尙書澄持不可乃削籍而寫亦虎仙者以貢至夤緣倖臣以秘術干上得侍左右橫甚至冒國姓嘉靖改元暴其罪并子壻論死西市逮王瓊戍之起彭澤爲兵部尙書九疇以都御史撫甘肅三年滿速兒以二萬騎入甘州九疇先登戰疾力走之殺火者他只丁部下傳滿速兒死九疇以聞上方念河西危急遣兵部尙書金獻民都督杭雄率師西討未至以捷

聞獻民等實不見賊而滿速兒故無恙事頗上聞諸議禮貴臣故善王瓊欲甘心澤九疇使錦衣百戶王邦奇劾奏之上怒甚大學士楊一清爲請不能得下法司議勒澤獻民歸里九疇且不測兵尙書胡世寧力言九疇雖輕信所部上功失實然其人忠力足任也且土魯番所忌惟九疇游辭反間變詐百出罪九疇是快夷心自隳干城非計乃戍之窮邊是時哈密已大殘餘衆千餘人走入塞守臣撫存之歲給耕種多五百石少百石而夷酋請乞煩我無以應乃以兵備副使趙載議裁其賜而滿速兒旣敗歸亦數使牙木蘭款關求貢尙書王憲遣夷使往諭復不報六年秋乃遣馬黑麻虎力孛翁來稱貢隨令牙木蘭入寇于是留其使肅州明年夏牙木蘭降牙木蘭者曲先夷也幼爲土魯番所掠壯而黠滿速兒倚之數苦邊

至是以入寇不從欲誅之懼而來奔頃之虎力納咱兒犯肅州趙載彭濬擊卻之督臣王瓊以所斬獲示馬黑麻等械下獄其年冬滿速兒請歸哈密瓊以聞下廷議時頗有言哈密難守不宜復詹事霍韜力言置哈密者所以離戎虜之交外領西域內蔽邊郡不可失也或難其守欲棄之則甘肅難守亦棄甘肅乎第宜覈夷情討軍實下令有能和輯諸戎屏我西陲則畀以其地毋規規忠順後爲也尙書世寧疏言先朝不惜棄交阯大寧何有于哈密且我實封殖忠順以爲外藩而自罕慎以來三立三爲虜後遂與戎比而窺我耗金幣勞士馬竭財力無尺寸功徒使戎得挾以爲資以邀索我臣以爲此與國初所封元孽和寧王順寧王安定王等耳安定王又在哈密西最近邊今皆存亡不可知我一切勿問而獨戀戀于哈密

何也昔光武閉玉關後世善之臣愚謂宜謝哈密專守河西毋煩憊中國報聞滿速兒時往來關下遣人索前使及欲得牙木蘭釋憾事聞將報許世寧復爭牙木蘭本我屬夷土魯番安得索之且彼所恃者寫亦虎仙火者他只丁今皆斃而牙木蘭復來歸是無柰我何我料兵食以備之結瓦刺以撓之拊新附賞有功內治既修何憂乎狡夷上是之章下瓊瓊引夷使伏塔下風諭朝廷威德爲言牙木蘭已他徙釋馬黑麻虎力孛翁俾入貢滿速兒再使來語稍恭瓊慰犒之遂以哈密歸然我竟不能有至二十五年復爲馬黑麻速檀所據語具土魯番傳中諸酋札吉孛刺等瓊皆爲請襲招居近地耕牧河西入貢如故哈密名存而地久沒矣初阿力虜王母以不助掠赤斤王母頗有威嚴能馭下王母虜赤斤諸衛相繼沒土魯

番日以金印爲市遞歸遞奪我自楊翥議襲後無能以一騎踰關而西一
闖其境徒重棄金印議論紛拏遣將召兵迄無虛歲而金印竟不返世寧
發憤力爭不能格也都御史唐澤御史劉濂疏曰今之處土魯番與哈密
迹有已然理有當然勢有必然撫之以恩則驕滋震之以武則力屈此已
然之迹也順則綏之而備愈嚴逆則禦之而武毋黷此當然之理也處置
得宜則彼此俱寧不則禍連而不解此必然之勢也蓋師戒輕舉寇難橫
挑其大者有五焉尺藉空虛屯田榛蕪兵食不充一也我屢挫而怯彼方
勝而銳二也我失瓦刺之援進則無資彼合瓜州之力退且有據三也河
東臨洮創夷未蘇赤斤諸衛零落殆盡根本旣搖藩籬亦撤四也西南苦
虜東北苦戎并力則捉襟深入則枵腹五也況哈密遠在磧外豺狼是鄰

強驅垂亡之部落復還久失之封疆兵必難留勢將自潰爲宜寬而撫之聽其自歸蒐乘補卒慎擇將帥募民廣屯塞下使軍實日充然後蹈瑕遺釁惟吾欲爲招瓦剌城瓜沙興哈密襟喉西域拱衛中華將無不可矣若今日則非其時也始王瓊與謫戍以議禮諸臣薦銳意哈密後心知其難卒請從澤等議焉

赤斤蒙古

赤斤蒙古周西戎戰國月氏秦漢屬匈奴武帝取爲酒泉燉煌二郡晉屬晉昌郡唐屬瓜州後沒於吐蕃宋入西夏元仍屬瓜州其地有白山多草木禽獸永樂二年故韃靼丞相苦朮子塔力尼率五百人來歸設赤斤蒙古千戶所以塔力尼爲千戶賜誥印所尋爲衛千戶爲指揮僉事十年叛

寇老的罕走匿赤斤命右庶子楊榮同豐城侯李彬議討之彬榮計道險轉餉難且隆冬興師非司馬法請止兵上從之以勅諭塔力尼遂擒老的罕來獻賜綺幣襲衣晉指揮同知塔力尼卒子且加失旺嗣晉都指揮同知宣德七年所部韃人祖失加卜等來歸命居之平涼正統元年且加失旺表言與韃鞑戰有功晉都指揮使五年晉都督僉事明年勅諭且加失旺及都指揮革古者可兒卽等曰近使者至哈密命爾與沙州衛護行爾獨棄朕命不遵革古者又時率其屬往來沙州爲盜暴苦行旅甚負朝廷所以建衛設官封殖爾等之意其改圖毋忽其年赤斤蒙古以瓦剌寇掠乞內遷肅州之白城山詔止之已請建寺其地守臣謂寺而不已且予之巢勿許便從之且加失旺卒子阿速嗣爲都督僉事指揮同知鎖火者乞

晉秩且言肅州都指揮胡麟阻其市易勅戒胡麟而以鎖火者爲都指揮
僉事先是且加失旺嘗言瓦剌也先來求婚未卽聽至是也先遣人要阿
速往受聘阿速以聞復請內遷避瓦剌報詔也先求婚朕向許爾父自擇
便宜不中阻顧受聘非宜往而見詐悔將何及赤斤爾世守地柰何棄之
爾第保險綏衆善自備朕且命邊將緩急爾矣是時瓦剌強赤斤蒙古與
沙州罕東名內屬然陰與虜市至受平章等官沙州酋薛令以爲言詔詰
責之十一年赤斤酋鎖合者赴闕下乞攜部落來歸上遣還下其事于總
兵任禮始苦尤娶西番女生塔力尼又娶于達達生鎖合者及革古者乃
分所部爲三帳自領中帳而使塔力尼領左隸以西番人鎖合者領右隸
以達達人至且加失旺父子相繼長赤斤部衆強欲并右帳相讐殺不休

鎖合者窘故自歸未幾死以其子切塔兒嗣爲指揮同知而哈密使者往來道赤斤爲其部酋劫掠阿速不能禁我兵捕獲劫者械至京釋之景泰元年以擒叛寇功晉阿速都督同知諸部下陞賞有差後復晉左都督五年瓦剌也先以書誘赤斤諸衛脇使助己阿速白其書上命守臣遣人諭阿速毋與瓦剌通成化二年阿速卒子瓦撒塔兒嗣爲左都督六年以其叔父乞巴失加卜丁二人爲指揮僉事佐瓦撒塔兒從夷族請也其明年瓦撒塔兒卒子賞播塔兒嗣十四年夷酋復表言賞播塔兒幼不更事指揮加定爲衆所服乞晉秩代視事賞播塔兒亦自請之報可以加定爲都指揮僉事仍令俟賞播塔兒壯還衛政是後土魯番陷哈密侵掠赤斤至正德間奪其印種人散亂多走塞下衛遂虛

安定 阿端

安定韃靼部也東爲罕東北抵古沙州地廣袤千里無城郭俗以馬乳釀酒羶帳爲廬產馬駝玉石洪武七年撒里畏兀兒安定王卜烟帖木兒遣使貢鎧甲刀劍等物賜織金文綺分其酋長爲阿端阿真苦先帖里四部給印章明年獻故元所授金銀字牌請立安定阿端二衛詔從之以夷酋沙刺等爲指揮等官永樂二年表貢馬五百匹遣河州衛指揮康壽往受之壽言令甲諸番貢馬償以茶官爲轉輸今安定遠不便請給布絹報可安定王立未幾爲曲先指揮沙刺所殺部落潰散至永樂十一年其孫亦攀丹來朝復故封歸安定賜以印誥二十二年中使喬來喜等往西域至必立出江死于賊都指揮李英率兵至罕東問故罕東指揮綽里加言賊

中使者安定曲先酋也英進兵擊安定斬四百八十級虜七百餘人獲駝馬牛羊十四萬有奇曲先遁去安定王詣闕頓首謝宥其罪遣歸宣德二年以安定僧賞觸領占爲戒淨慈應國師給誥命銀印是後安定王與國師屢入貢而國師之外復有禪師正統時國師則桑出鄰真禪師則攝刺藏卜攝刺藏卜者禪師賞竹領真之姪也賞竹領真自永樂時來歸居西寧卒而攝刺藏卜嗣仍留西寧都指揮汪清疏其窺伺內地恐患邊詔歸安定輔其王九年安定酋那南奔等掠曲先我使往問復爲所掠勅戒亦攀丹約束部落毋生事十一年亦攀丹卒子領古幹些兒嗣王尙幼以其叔輟思參已爲都指揮僉事佐之成化時爲土魯番殘破苗裔散失至弘治初安定王領真幹卽兒子千奔請嗣王許之終弘治世千奔時入貢正

德七年亦卜刺破安定奪誥印據其地餘衆內徙嘉靖閒復令部酋嗣爲指揮領其衆然安定王後無傳而阿端久沒莫知其處矣

曲先

曲先在安定西古西戎部落元置曲先答林元帥府洪武四年設曲先衛以土酋散西思爲指揮同知其後爲朶兒只巴所攻并曲先入安定居阿真地永樂四年指揮哈三散卽思三卽等表言西番侵暴乞仍立衛徙治藥王淮報可以三卽領衛事給印章并徙安定治所於昔兒丁永樂末散卽思及安定酋劫殺中使洪熙改元命朱英討破安定追躡崑崙西數百里至雅令闊地曲先遠遁英還師都督史昭言叛酋未獲宜窮追詔已之宣德二年散卽思復掠使者及西域貢使命史昭率安定罕東兵討之散

卽思懼而逃遣弟千戶堅都等進馬贖罪上以遠夷不足較宥之還其俘令居故部指揮那那罕表言二女四弟及部落五百餘人皆爲安定所虜及餘衆潰居西番江不敢歸詔安定王亦攀丹索部下遣還仍諭居西番江者使復業其後屢入貢然亦苦土魯番內徙失故地

罕東 罕東左

罕東在赤斤蒙古南亦西戎部落洪武二十五年侵塞涼國公藍玉討之將佐諫勿深入不聽師至阿真川土酋哈咎等皆遁去不見虜而還三十年酋長鎖南吉刺思遣使入貢立罕東衛以鎖南吉刺思爲指揮僉事永樂二年與其兄答力襲等十六人貢馬晉指揮使塔力襲爲指揮同知頭目奴奴爲指揮僉事皆賜冠帶鈔幣自是貢不絕洪熙元年指揮那那奏

所部夷人以負內供馬逃赤斤復坐官兵討曲先相驚欲爲亂上令守臣招撫之使復業曲先之役罕東頭目班麻思結率所部從擒斬首虜獲駝馬牛羊以獻宣德七年論功授指揮使九年罕東別部劄兒加邀劫使者命都督劉廣史昭討之廣昭相與計寇負罪重必深匿我以討叛名而遁逃之弗誅兵且無震乃先使指揮祁賢以百騎往覘敵行月餘渡畢力朮江劄兒加詣賢自歸請還所掠貢馬謝廣等以聞命宥之正統五年赤斤蒙古言指揮鎖合者殺人逃罕東且誘其部落哈密亦言罕東擅相攻虜掠人畜兩詔戒諭之十四年班麻思結言哈密來侵上念諸夷數相告言構怨無已時而哈密又累誘瓦刺盜塞下詔都御史馬昂約勒忠順王母與罕東讎且令偵虜情報我成化九年土魯番攻奪哈密都督李文右通

政劉文奉命調罕東兵往討逡巡解歸是時罕東諸夷皆困土魯番而夷酋奄章先因與諸族讎殺逃居沙州朝廷許其耕牧輸貢部落日蕃班麻思結卽奄章子也至是其孫只克以沙州衛旣廢請立罕東左衛治其地下兵部議從之以只克嗣其祖官領衛事已晉都督僉事弘治八年土魯番掠沙州迫諸夷自附只克請救用兵部尙書馬文升議發罕東兵襲之我師出罕東失期不能有大功自是土魯番入寇每假道罕東令給食而亦不刺安定數掠其資罕東愈微至弘治時往往款肅州塞求恤矣只克卒孫日羔刺嗣爲都督嘉靖初與別酋帖木哥土巴先叛附土魯番者皆來歸邊臣請分其衆半居肅州白城山半居威虜仍擇其壯勇練習之番休迭上皆聽日羔刺約束部落侵蕃而我邊以餉夷糜倉粟坐困

沙州

沙州與赤斤接境洪武二十四年王子阿魯哥失里遣使朝貢永樂三年置衛以其酋困卽來買住二人爲指揮使給冠帶印誥困卽來領衛事遞進都指揮都督宣德七年來告饑上語戶部臣曰救災恤患朕固不吝然勞內以事外非計其命肅州具糧五百石使困卽來自取之頃之言諸夷侵掠請徙居察罕舊城不許正統四年所部都指揮阿出不花等遁入哈密及罕東酋班麻思結等竄居其地困卽來以聞上命哈密罕東還其遁并歸侵地仍諭困卽來善撫部落毋盜鄰啓釁其後屢偵瓦剌哈密事情遣使來告上嘉勞之賜綺幣晉其子都指揮僉事喃哥及指揮僉事薛令等各一秩七年令邊將率戍卒助修苦峪舊城從困卽來請也城竣入謝

賜綺幣襲衣歸言瓦剌也先欲爲弟娶其女詔聽自便九年困卽來卒困卽來受職四十餘年朝貢頗恭官爲祭賻以喃哥嗣爲都督僉事弟克羅俄領古爲都指揮使佐喃哥領衛事明年沙州衛都指揮兀魯思不花貽書邊將言指揮乃兒不花等欲誘瓦剌掠沙州守臣以聞上曰是書無喃哥名何也其令總兵任禮使人往覈之其明年任禮疏言喃哥弟鎖南奔爲瓦剌僞封今喃哥復言其就婚罕東虞有他變勅禮招撫之十三年禮擒鎖南奔以獻兵部請正法上以其父兄恭順釋弗誅是時喃哥以困瓦剌率部屬二百餘戶一千二百三十餘人來歸命居之山東平山東昌二衛自都督而下給糧及耕地有差沙州遂廢未幾喃哥卒克羅俄領古嗣後賜姓名羅秉忠

論曰明興諸夷自北虜外其煩憊中國則哈密爲甚虜紛我者也哈密我自紛也夫土魯番雖勁不能當虜十一然而驅諸衛蹂近關如雉兔然則安在其爲我藩哉情見勢彰恩威俱詘權衡操縱此爲其時而猶欲噓旣燼之灰戀將棄之肋捐厚幣市空城以庶幾悔禍于戎心亦已過矣議者徒見其綰轂西戎憚委成勞不知燉煌置郡始自漢武今哈密諸衛卽其地也輪臺一詔卽武亦業悔其罷之晚矣二祖之封殖蓋云以夷防夷寧樹彼以勞我哉王恭襄才臣經營招附亦頗有勞以伎敗名謀國者鑒諸

西番考

西番古吐番地本羌屬凡百餘種散處河湟江岷閒至唐時併吐谷渾始盛唐末復衰宋入貢不絕元世祖始郡縣其地以番僧八思巴爲大寶法

王帝師領之嗣世弟子號司空司徒國公佩金玉印明興洪武二年遣使持詔諭之隨寇臨洮守將韋正禦之時河冰未合師不得濟正祝天賊若平者則令河冰頃之有冰如巨屋自上流而下風隨之冰合卽渡河擣其營賊大驚請降自是諸部相繼來歸六年令諸酋舉故官受職以攝帝師喃加巴藏卜爲熾盛佛寶國師給玉印置烏思藏朶甘二指揮使司及宣慰司招討司元帥府萬戶府官故國公南哥思丹八亦監藏等爲指揮宣慰招討元帥萬戶等官領之明年陞烏思藏朶甘爲都指揮使司置西安行都指揮使于河州以韋正爲使統二番司復封番僧爲大寶法王大乘法王闡教王護教王闡化王贊善王凡七王各給印誥俾導其衆約比歲或閒歲一貢使者時往撫諭八年川藏族殺我使鞏哥鎖南等於是命衛

國公鄧愈爲征西將軍沐英副之討川藏師分三道進覆其巢窮追至崑崙山俘男女一萬口馬五千匹牛羊十三萬而還十二年洮州十八族番酋三副使汪舒朶兒瘦曠子阿卜商等叛據納鄰七站復命英討之英兵至洮州賊皆遁去斬叛逃土官阿昌失納等築城于東籠山南川留兵戍之疏聞上曰洮州爲西番門戶城之是扼其喉矣命置洮州衛英兵進擊三副使瘦曠子悉破擒之斬獲人畜甚衆十五年勅松州衛指揮耿忠令番人計戶出馬充賦名爲差發二十年禁番使闌出麻鐵二十五年建昌衛指揮使月魯帖木兒繹忽樂等叛都指揮使瞿能討之月魯帖木兒遣人請降諸將疑其詐請擊之能不聽賊遂遁去上命涼國公藍玉討之月魯帖木兒與瞿能戰敗玉誘執之送京師伏誅玉因言四川地曠山險控

扼西番連歲蠻夷梗化蓋由軍衛少而備禦寡也宜增置屯衛杜遏奸萌從之玉又請籍民爲兵并討長河西朶甘百夷上曰民勞甚復籍之其何以堪長河西諸夷姑待後舉玉遂班師明年製金牌信符遣使頒給諸番諭之曰往者朝廷有需于爾必以茶貨償之未嘗暴有徵也近聞邊將多假朝命漁獵爾等朕甚惡之今後遇有差發必合符乃應不者械至京罪之隨立茶馬司於洮河二州聽番人以馬易茶民毋得私市違者死遣曹國公李景隆至番市馬以茶五千餘斤得馬一萬三千五百餘匹分給衛士復令禮部檄長河西打煎爐番酋責以納馬修貢諸番咸稽首奉約茶法大行永樂元年遣使賜番酋及諸國師白金鈔幣定番族來朝賞格四年迎番僧尙師哈立麻至京封爲大寶法王厚賜遣歸明年遣指揮劉昭

等往西番設驛通使仍撫諭軍民昭還遇番賊劫掠率衆攻敗之洪熙時曲先安定二衛酋邀殺中使朱英討破之以番兵從征功國師宛卜格刺思巴等皆晉秩給誥命銀印宣德元年遣太監侯顯等使諸番更三歲方歸正統四年生番隨渠等八百二十九寨寨首曲吾巴等各遣僧入貢初諸番有欲貢者爲生番所阻松潘守將趙得遣人諭之故相率貢指揮趙諒與番僧商巴有隙因與得誘執之掠其財其弟小商巴率衆入犯遣都御史王翱都督李安討之翱察其枉出商巴于獄具以聞諒伏誅得謫戍復命商巴爲國師十四年停西番金牌歲遣行人四人視茶政景泰間西番黑樓等三十一處男婦一百餘人朝貢諸番柔服獨董卜韓胡都指揮使克羅俄監粲稍桀黠悖慢屢詔讓之未幾死天順五年番寇涼州圍都

督毛忠總兵宣城伯衛穎戰卻之八年西寧番族把沙作亂穎與巡撫都御史吳琛率衆討破之初番僧入貢不過三四十人景泰漸增至天順遂至二三千人前後絡繹賞賜不貲所至騷動成化元年禮臣以爲言詔諭闡化王令遵貢期三歲一至毋多人毋雜用國師禪師等印未幾番僧劄巴堅參等以秘密法進天子愛幸之法王封號至累數十字導從用執金吾仗賜予駢蕃其徒錦衣玉食至數千人矣九年岷州番入寇千戶包景禦之被害十七年給烏思藏諸番王及長河西魚通寧遠等宣慰司勅書勘合令貢時四川陝西驗入十九年以都御史阮勤言歲運四川茶十萬斤至陝給賜番僧二十四年罷行人巡茶以御史一人代之自景泰後茶政稍弛番馬多不至非復國初時矣弘治末命都御史楊一清理其事一

清請復金牌信符舊制疏曰臣考前代自唐時回紇入貢已以馬易茶宋熙寧閒行之所謂摘山之產易廐之良無害而有利計之得者我朝納馬謂之差發如田之有賦身之有庸必不可闕非虐使于番也因納馬而酬茶體尊名順非互市交易之比也且非獨以馬故也蓋西番之爲中國藩籬久矣自漢武帝表河西列四郡斷匈奴右臂而漠南無王庭今金城之西綿亙數千里北有狄南有羌狄終不敢越羌而南者以羌爲世讎恐議其後也不然則河洮岷隴之區能無戎馬之跡乎夫羌夷之人本非孝子順孫徒以資茶于我絕之則死故俛首服從此制番控虜之上策前代略之而我朝獨得之者也頃自金牌制廢私販盛行雖有巡茶之官卒莫能禁坐失重利垂六十年豈徒邊方乏騎乘之用將來遠夷無資于我跳梁

自肆將生意外之憂撤藩籬之固甚非計也請下所司申明舊制昭示番族使知朝廷修復信符各供差發其不受約束者徵兵問罪以警其餘奏上議行之正德初番僧復肆法王綽吉我些兒者烏思藏使也以術得幸出入禁中請授其徒二人爲國師還居烏思藏如大乘法王例入貢禮部尙書劉春言烏思藏遠在西方性極頑獷雖設四王撫化而其來貢必爲之節制令毋患邊而已今無故遣僧往萬一詐誘羌胡妄有所求請因以冒利不從便爲失異俗意從之則反生事端其害甚大請罷之不聽尋遣奄劉允入番取佛禮部尙書毛紀及臺諫連章諫止俱不聽是時西海逋虜亦不刺暴掠西番無寧歲徵兵逐勦虜避走松潘旋歸故巢費以萬計竟無成功嘉靖元年西番反鎮守都督鄭卿討之不能克自是歲入境殺

擄人畜卿與諸將各擁兵不戰總督尙書王憲以聞詔讓卿八年洮岷番賊數入鞏昌隴右騷動兵部議四番爲患皆因茶禁弛廢處置失宜故相挺而起此所司之過且聞番衆爲亦卜刺侵苦因以役屬番胡交通益肆猖獗何以善後昔漢趙充國不戰而服羌段熲殺羌百萬軍興煩費內地爲之虛耗是知用勇將者逞目前之快任老成者獲萬全之安乞廣宣帝之明專充國之任制馭方略悉聽總督尙書王瓊假以便宜毋有所撓從之瓊徵集大衆開諭諸番示以福禍多聽撫惟若籠板爾及刺啣等族不服乃分兵攻之破若籠板爾二族蕩其巢刺啣等族震懾稽首聽命凡斬首三百六十餘級降七十餘族諸番復定十二年烏都鵠鴿番爲亂四川巡撫楊守禮討破之是時金牌爲海虜所掠盡散失二十八年劉崧以爲

言兵部議番族變詐不常北虜抄掠無已脫給而再失失而又給而又失之如國體何夫番人納馬欲得茶耳誠嚴闌出之禁雖無金牌馬將自集不然終無益也宜給勘合如成化故事從之四十二年烏思藏闡化等王請封上以故事遣京寺番僧遠丹班麻等爲正副使以通事序班朱廷對監之班麻在途騷擾廷對歸白其狀禮部議自後請封卽以勅付其使毋別有所遣從之封諸藏之不遣番僧自此始也王瓊既定諸番亦卜刺亦爲虜所收復西陲稍寧至隆慶末虜俺答以迎佛爲名復駐牧西海蠶食口甚番人大困矣其地自烏思藏朶甘二都指揮使司外爲指揮使司一曰隴答宣慰使司三曰朶甘曰董卜韓胡曰長河西魚通寧遠招討使司六曰朶甘思曰朶甘隴答曰朶甘丹曰朶甘倉澹曰朶甘川曰磨兒勒萬

戶府四曰沙兒可曰乃竹曰羅思端曰別思麻千戶所十七曰朶甘思曰
刺宗曰孛里加曰長河西曰多八參孫曰加八曰兆曰納竹曰倫答曰
果由曰沙里可哈思的曰孛里加思東曰撒里土兒干曰參卜郎曰刺錯
牙曰泄里壩曰潤側魯孫皆洪武閒所置其後亦時有增設及族種甚繁
不勝紀焉番有生熟其受差發者爲熟番不者爲生番俗質直朴魯上下
一心君臣爲友吏治無文音樂尙琴瑟食酪衣氈居毛帳務耕牧好狠鬪
貴壯賤弱懷恩重利尊釋信詛其山川崑崙山可跋海黃河析支湟水爲
大物產犂牛羴羊草上飛骨篤犀金剛鑽馬價珠銅佛天鼠皮氍毹沙棠
樹黑驢爲奇貢道由四川陝西屢違約多人且不如期至隆慶三年俱限
三年一貢定名數每處赴京毋過十人餘留邊候命賞賜有全有減著爲

令

論曰西戎爲患自三代然矣盛于漢熾于唐而馴服于明非向背之情異也合則強分則弱勢固然耳然當其強也足以抗虜及其弱反折而入于虜抗虜則虜虞是虎爭之形也折而入于虜則我虞是蠶食之漸也是又無全利全害者也夫正嘉以前河湟之守未失虜不西也自亦卜刺逋俺答譎而青海爲虜穴矣負嵎而眈眈我其能久有羌哉以羌合羌尙爲我患以虜合羌憂方大耳夫欲制羌命伐虜謀則有高皇帝之神謨在其毋泄泄然以羌予虜也

土魯番考

土魯番本漢車師前王地晉屬高昌郡唐爲交河縣在火州西百里永樂

六年番僧清來率其徒法泉等來朝貢方物命清來爲國師法泉等爲土魯番僧綱司官賜鈔幣遣歸九年土魯番總統古麻刺失里十一年萬戶賽因帖木兒各遣使貢十三年吏部員外郎陳誠使西域歸土魯番遣使隨誠入貢後遂授其酋長爲都督都指揮等官宣德五年番酋都督僉事尹吉兒察及指揮僉事猛哥帖木兒等各率其孥來朝請留京師自効上嘉其誠從之賜居第什器尹吉兒察死其子卜烟川兒復自土魯番來歸授指揮僉事正統天順間土魯番朝貢不絕成化初阿力始強自稱速檀猶王也累引兵劫掠哈密諸郡地幾盡九年遂入哈密據其城執王母奪金印阿力死子阿黑麻嗣阿黑麻死子滿速兒嗣相繼擾哈密及赤斤蒙古諸衛攻掠甘肅爲患不休嘉靖初王瓊招撫之復歸哈密語具哈密傳

中滿速兒死子沙速檀嗣次子馬黑麻復據哈密耕種沙州遣使求貢并求給地以居守臣以聞兵部議土魯番父子世濟兇惡今馬黑麻結婚瓦刺潛耕屬衛意在西抗彼兄東侵我土奸謀發露乃始款關求貢請居近地此正欲爲窺伺甘涼之謀漸不可長宜令守臣諭以華夷界限不可踰越毋妄乞地方毋盜種沙田毋殘害哈密毋苛取貢夷乃可許其通使如執迷不悛陽順陰逆則宜徵兵征討閉關絕貢詔可二十六年馬黑麻赴關納款土魯番使火者阿力克等八百餘人因而扣關總兵仇鸞巡撫都御史傅鳳翔盡延入關居之甘州故事土魯番五年一貢貢使半留肅州半留甘州至是諸夷貢不如期且請毋析居屬楊博代鳳翔不許因稍爲調停示寬恤詔姑從之仍奪鸞鳳翔博俸有差嘉靖末沙速檀以潛掠北

虜中流矢死弟馬速嗣屢貢隆慶時馬速死馬黑麻嗣其弟瑣非速檀虎來失速檀阿卜撒亦並遣使求貢守臣爲請禮部言瑣非等所請本非令申但遠人効順難以終絕而一姓四使又於禮不可宜姑令瑣非等各附一使於馬黑麻使中以示羈縻制可其地去哈密千里中經黑風水草俱乏難以遠據而自阿力以來皆挾哈密以徼利至隆慶後不復言哈密事土魯番亦戢始陳誠使回言其國城西百里有靈山最大夷人言此十萬羅漢涅槃處也近山有高臺傍有僧寺寺下皆石泉林木從此入山行二十里至一峽峽南有小土屋屋南登山坡坡有石屋屋中小佛像五前有池池東有山山石青黑遠望紛如毛髮夷人言此十萬羅漢洗頭削髮處也循峽東南行六七里登高崖崖下小山纍纍峯巒秀麗峯下白玉成堆

似玉輕脆不可握堆中有若人骨狀者甚堅如石文理明晰顏色光潤夷人言此十萬羅漢骨也又東下石崖崖上石笋如人手足稍南至山坡坡石瑩潔如玉夷人言此辟支佛涅槃處也周行羣山約二十餘里悉五色砂石光焰灼人四面峻壑窮崖天巧奇絕草木不生鳥獸鮮少云自誠使後土魯番漸張吞併諸國地大人衆異於向時矣其地近土魯番者爲火州柳陳

論曰土魯番彈丸地耳漢一戍已校尉足鞭箠諸國唐麴文泰稍不恭侯君集偏師執之無留行也乃至明而桀甚何哉豈祖宗之神威淵畫詳於北而略於西無以震之故歟釁興于哈密而禍結于邊陲綿綿涓涓裁之不早固禦戎之鑒也



四夷考下（蒼霞草卷之二十）

福清 葉向高進卿甫著

北虜考

北虜東至兀良哈西至瓦剌皆其地而兀良哈以內附爲屬夷別有傳其
竄據沙漠爲中國患離合盛衰代變靡常大抵元遺孽也高皇帝洪武元
年秋大將軍徐達副將軍常遇春兵二十五萬北伐逼元都元主夜開建
德門及其后妃太子遁出塞居開平而使其將擴廓帖木兒將兵自太原
來侵達聞徑擣太原擴廓還兵自救達與遇春計以精兵夜襲破其營擴
廓僅從十八騎遁去其明年春遇春兵至大同守將竹貞棄城走元丞相
也速攻通州曹良臣拒卻之元兵自是不敢窺北平而納哈出據金山李

思齊張思道據秦隴皆名元臣擁兵自固上以書諭元主曰自古有國家者必仰觀天命俯察人事君之祖宗起自北方奄有中土及君之身中外多故朕以淮右布衣仗義興師芟夷羣雄此寧人事亦天命也以君知時通變遠遜沙漠故戒戢將吏勿復窮追君不見察益縱部下令盜吾邊人民苦之若此者恐非君之福也以朕爲君計誠宜限地自守修德順天蘄延世祀毋輕動貽悔又書諭納哈出皆不報達等師遂西李思齊走臨洮上以書招之思齊降張思道走寧夏爲擴廓所執其弟良臣以慶陽降頃之復叛達攻殺之遇春自鳳翔奉命分兵取開平李文忠副之過惠州次全寧敗也速兵進攻大興州破擒元丞相脫火赤遂克開平俘其宗王慶生及平章鼎住等斬之元主益北遁遇春還師至柳河川卒文忠代將其

兵元攻我大同文忠擊敗之擒其將脫列伯而大將軍亦悉下秦隴還師其年冬王保保襲蘭州王保保者擴廓帖木兒別名也守將張溫固守指揮于光來援兵敗被執保保昇至城下使呼溫降光大呼守者第毋降大將軍援至矣保保殺之明年春上以保保數擾邊復命達爲征虜大將軍李文忠馮勝爲左右副將軍鄧愈湯和爲左右副副將軍北伐問諸將策安在咸言宜直取元主上曰王保保方在塞下舍近圖遠失緩急之宜非計爾達其自潼關出安西擊王保保爾文忠自居庸入沙漠追元逋寇兩軍並舉虜在穀中矣諸將皆頓首曰善達軍出安定營沈兒峪口保保潛遣兵襲東南壘敗左丞胡德濟達親救之乃卻因斬裨將數人械德濟送京師明日合戰衆咸奮大敗保保兵擒其將士八萬四千五百餘人馬萬

五千餘匹雜畜稱是保保走和林是夏元主殂于應昌其國人謚曰惠宗上嘉其達變遣使祭而尊之曰順帝太子愛猷識里達臘立亡何李文忠擣應昌破之獲太子買的里八剌降其衆五萬人宮女財寶圖籍不可勝計元主以餘兵走和林捷奏上封買的里八剌爲崇禮侯復致書元主告以謚順帝及封崇禮侯之意而下詔漠北曰朕卽位初遣使臨諭四夷咸奉職納貢惟漠北以庚申君故未及今彼祿位已終人心絕望爾諸部酋長各依職來附朕當更給印章還領所部毋爲寇災矣朕旣爲天下主視華夷無閒凡馬牛羊孳蓄從便地牧養違者且舉兵加誅毋執迷貽悔于是諸酋相繼歸附獨王保保猶在和林上屢招之皆不報五年春命徐達爲征虜大將軍李文忠爲左副將軍馮勝爲征西將軍分三路討之達與

虜戰不利歛兵守塞勝軍至蘭州右副將軍傅友德先進多所斬獲甘肅
守將上都驢率吏民迎降進至亦集乃路元岐王朶兒只班遁去追獲其
平章長加奴等又敗之瓜沙文忠進兵臚胸河留部將韓政守輜重令士
卒人持二十日糧兼程疾趨敗虜將蠻子哈刺章于土刺河追至土魯渾
河虜益衆搏戰文忠馬中流矢步持短兵接戰裨將李榮以所乘馬授文
忠自奪虜騎乘之文忠戰益力窮追至稱海虜遁去師還明年春虜先後
寇永平慶陽塞守將輒擊敗之達文忠等復往諸邊備胡當發上自臨諭
創業之初君臣同其艱難及于事平念欲休息願居安慮危古人所慎比
聞胡人窺塞豺狼出沒重煩卿等其爲朕總率將士鎮遏邊陲清野以待
其來盡銳以擊其惰至邊之口宜先圖上方略使朕覽焉達行至臨清聞

虜寇武朔諸州遣陳德郭子興馳往擊之虜遁去德子興追敗之答刺海口斬獲甚衆鴈門守將吳均大同守將王約復相繼破虜擒其平章定定等璽書戒達以殘胡擾邊連歲未滅孰任其咎昔田單攻狄不下魯仲連謂其有生之樂無死之心卿等念哉其冬達破王保保兵于懷柔明年夏都督藍玉敗元將脫因帖木兒遂取興和李文忠亦遣裨將擒其平章陳安禮木屑飛太尉伯顏不花斬其將眞珠驢復親率兵攻其高州大石崖克之斬宗王朶朶失里擒承旨百家奴進至氈帽山破斬魯王及司徒答海俊等其秋遣崇禮侯北歸明年王保保卒保保屢敗屢奮元主倚以自強上欲致之不能心壯其節閒問諸將今孰可稱奇男子者咸對曰副將軍遇春上曰非也遇春我得而臣之如王保保眞奇男子耳因策其女爲

秦王妃也而參政蔡子英者亦義不事明子英故爲保保所知定西之敗走匿關中吏行求得之械送京師過洛陽信國公和困辱之終不屈其妻聞子英至欲見之子英不許至京上命以官不受退而上書閒一夕大哭人問之故曰思舊主耳語聞詔有司送出塞是時愛猷識里達臘殂次子脫古思帖木兒立丞相驢兒哈刺章蠻子及國公脫火赤平章乃兒不花等時寇塞下十三年春西平侯英討擒脫火赤明年大將軍達率諸將征乃兒不花至北河襲灰山大克獲而還而納哈出猶據金山寇遼東邊將屢敗之獲其將乃刺吾初大師克燕納哈出俘至京上遇之厚竟釋歸聚衆至三十萬輜重饒于虜主上以舊好屢招之不聽二十年春乃命宋國公馮勝爲大將軍率穎昌侯傅友德永昌侯藍玉南雄侯趙庸定遠侯王

弼兵二十萬往擊之復遣乃刺吾歸諭之降勝軍出松亭關累敗虜兵乃刺吾至納哈出驚喜執手勞問殷勤乃刺吾盛言上所以遣歸及綏來意由是其衆多欲降勝軍駐金山納哈出使使來稱款然陰覘我師勝遣永昌侯玉往受其降虜使歸具言師盛乃刺吾亦勸之力納哈出嘆曰天不與我有此衆矣遂率數百騎身詣玉玉飲之酒懽甚酌酒酬玉玉解衣衣之曰君服此我乃飲納哈出不肯服玉亦持不飲爭之急納哈出怒取酒澆地顧左右咄咄語欲脫去時鄭國公常茂爲輔行茂麾下趙指揮者解胡語以告茂茂直前搏納哈出傷其臂不得去遂擁以來而所部將士在松花江北聞之大驚潰勝急遣降者觀童前往諭降其衆得諸鹵簿甚衆師還都督濮英等爲殿殘寇伏道左突出殺英勝上鄭國公茂驚潰虜衆

狀茂亦訐勝軍中陰事爲勝負以是賞不行濮英以死事贈金山侯納哈出至封爲海西侯賞賜慰勞之甚厚其秋遣使卽軍中拜永昌侯玉爲征虜大將軍率延安侯唐勝宗武定侯郭英都督耿忠孫恪及定遠侯弼等征虜明年夏玉率兵由大寧進至慶州聞虜主脫古思帖木兒在捕魚兒海兼程進去海四十里而軍不見虜欲還定遠侯曰將軍提十餘萬師入虜地勞費甚而不見虜自還將何藉手見主上乎玉乃令諸軍穴地而鑿毋令虜見煙火乘夜疾抵海知虜營在東北八十里亟薄之會大風揚沙晝晦虜不意師至大驚太尉蠻子率衆拒戰破殺之虜主與其太子天保奴知院捏怯來丞相失烈門等數十騎遁去玉追之不及獲其次子地保奴及妃主等五十九人部酋二千九百餘人男婦七萬七千餘人馬駝牛

十五萬盡焚其甲兵而還俘玉璽書襃玉地保奴等給第居之京師既而有言玉私元主妃上怒玉無禮妃聞之慙懼自經死地保奴頗有怨言上曰吾嘗欲封之以存元祀今如此其居之琉球遣使護往脫古思帖木兒既遁免欲往和林依丞相咬住行至土刺河爲其臣也速迭兒所襲衆復散獨與捏怯來等十六騎偕適咬住來迎欲共依闊闊帖木兒值大雪不得發也速迭兒襲執縊殺之并殺天保奴捏怯來等遣使來降命居之全寧應昌諸處未幾失烈門襲殺捏怯來部落遂潰故丞相咬住太尉乃兒不花知院阿魯帖木兒時寇邊上命英國公友德等以燕兵從燕王定遠侯弼等以晉兵從晉王往征之燕王者成祖文皇帝也師出古北口文皇帝臨塞諭諸將曰虜地曠絕吾千里行師無閒諜難以成功乃發騎訶知

乃兒不花等駐迤都，遂冒雪抵其營。虜不知也，指揮觀童者與乃兒不花有雅故，前往說之。乃兒不花迫遂偕觀童來見文皇帝，慰接之，酒食遣歸。度將至，營復召之如此者三，虜不能測，悉收其部落馬駝牛羊還，捷奏上。嘗曰：清沙漠者燕王也。明年夏，文皇帝督潁國公出塞捕番將阿失里等。其秋，命都督劉眞、宋晟征哈梅里、哈梅里，在和林西元，屬兀納失里大王居之。往來患苦西域諸貢使，上嘗遣使招諭之，不從。眞等攻破其城，兀納失里遁去，俘獲甚衆。于是虜益衰終，高皇帝世，脅息遠遁，不敢大爲寇。而上亦大封建諸王，藩北邊。璽書時下，惟詰戎制虜爲務。虜自脫古思帖木兒殺後，大臣紛拏，蓋五傳至坤迭木兒，咸未幾而弒，不復知帝號矣。文皇帝初，鬼力赤立稱可汗，去國號，復稱韃靼，獨所部大酋猶稍稍仍漢官名。

永樂元年遣使賚書諭鬼力赤曰元運旣終我皇考太祖皇帝受天命撫有天下朕以嫡子奉藩于燕入繼大統嘉與萬邦同臻安樂比聞塞北推奉可汗特遣指揮朶兒只恍惚等持文綺四往致朕意今天下大定溥海內外皆來朝貢可汗能遣使往來通好爲一家使邊城萬里烽埃無警彼此熙然共享太平之福豈不美哉并勅其太師右丞相馬兒哈咱太傅左丞相七孫台太保樞密知院阿魯台告以遣使往來意各賜文綺二頃之虜寇遼東懿路寨官軍頗失利虜亦引去上復書諭之其秋鬼力赤阿魯台率衆西與瓦剌馬哈木戰大敗瓦剌者元別部也當洪武時強臣猛可帖木兒據其地死而衆分爲三其酋曰馬哈木曰太平曰把禿孛羅不肯與可汗朝會相讐殺不休明年夏遣使完者禿賚勅諭瓦剌今天下一家

莫不來庭惟爾北部猶觀望未歸使者往爾其遣人通好朕當授以官賞俾安本土射獵畜牧毋外王化并賜以文綺馬哈木等遂遣使入貢其使往鬼力赤者皆不返四年夏諭鬼力赤令還所遣使不報諜言也孫台爲部下所殺馬兒哈咱奔瓦刺阿魯台逃居海刺兒河上曰事虛實未可知第戒邊將善爲備明年春韃靼僧耳亦赤也兒吉你兒灰等來歸上遣還令資綵幣賜虜酋仍密諭寧夏守將是或爲虜間宜防之鬼力赤立數年以非元種衆不附迎本雅失里欲立之上諭本雅失里曰近聞鬼力赤迎爾北行以朕計之鬼力赤與也孫台爲肺腑親爾與之勢不兩立夫元邇來六代相傳無一人得善終者爾之保身亦何容易自古有天下者皆前代子孫爾元氏宗嫡當奉世祀如能幡然來歸朕當加以封爵居以善地

爾其審之未幾虜竟殺鬼力赤立本雅失里爲可汗上遣給事中郭驥指揮金卜歹往使復諭以通好本雅失里殺使者西與瓦剌戰爲所敗七年夏封瓦剌馬哈木爲順寧王太平爲賢義王把禿孛羅爲安樂王給誥印其秋命淇國公丘福爲征虜大將軍率武城侯王聰同安侯火真靖安侯王忠安平侯李遠往擊虜上諭福曰本雅失里逆天道殺信使故命爾徂征爾必戒之出開平而北卽不見虜亦常如對敵遇虜設奇奮擊不得便卽止毋爲虜所給仍告本雅失里以興兵問殺使之罪虜脫脫不花王把禿王僞丞相答卜王等相繼來歸福率千餘人先至臚胸河遇虜游兵擊敗之乘勝渡獲虜尙書一人飲之酒問可汗安在尙書言可汗聞兵來欲北遁去此可三十里福喜曰可疾馳擊擒此虜矣時諸軍未集諸將皆以

爲此訂我不可信不聽令尙書爲鄉道徑前薄虜營虜佯敗誘我深入福銳意乘之安平侯泣諫曰將軍輕信謀者言懸孤軍至此虜示弱犂我也將退欲乘我進且覆我徼疲極取我耳將軍獨不念陛辭日上諄戒乎而躁亂若此計獨宜結營自固晝揚旗伐鼓出奇兵挑之夜多燃炬鳴礮張軍聲使虜莫測一二日我大軍至并力擊之何不克也卽不然猶可全師歸何慮不出此而自取敗亡爲武城侯亦力言福皆不從謀使同安侯使虜僞求和以兵繼之同安侯不欲行福厲聲曰違令者斬乃先馳馬行控馬者皆泣下諸將不得已從之卒遇虜安平侯力戰殺數百人馬蹶被執死之五將軍皆歿師殲焉上聞之震怒意欲大創虜拔亂原乃召諸將議親征第患道遠轉餉難尙書夏原吉議用武剛車三萬輛約運糧二十萬

石踵軍行過十日請築一城貯之留軍守又十日亦如之庶濟師上曰善如其計名所築城曰平胡曰殺胡明年春詔曰朕受天命承洪業統御萬方普天率土靡不從化獨北虜殘孽肆逞兇暴屢使拊循輒見拘殺恩旣謫背德豈可懷朕仰稽天道則其運已絕俯驗人事則彼衆已離今親帥六師彰天討大擊小順取逆治攻亂逸伐勞悅弔怨五者必勝之道也蕩除有罪廓清疆宇庶幾一勞永逸暫費永寧於是命原吉輔皇長孫居守北京學士胡廣侍講楊榮金幼孜從明年三月發京師次鳴鑾鎮順寧王馬哈木等遣使貢謝上登凌霄峯望漠北顧謂廣等元盛時此皆民居今萬里蕭條惟風埃沙草耳衰微若此而倔強何哉次清水原地鹹鹵水泉不可食上默禱泉湧出賜名神應泉次環翠峯獲虜人訊知虜居兀古兒

札謀西奔上謂導者虜西而我軍東北趨恐左若西北邀之可獲也導者固請趨兀古兒札上曰以爾爲導宜從爾至則虜果遁倍道追之及虜于斡難河斡難河者元太祖始興地也本雅失里率衆戰大敗以七騎絕河遁去裨將劉江梁福等追之不及還正月班師至廣漠鎮前騎報阿魯台聚衆山谷中遣使諭之阿魯台欲降所部議異遂迎戰敗走上曰虜性貪雖敗且窺吾後乃伏兵數百於河曲柳林中使數卒實草於囊負之行上親率精兵千餘後諸軍發虜望見負囊者爭趨之伏兵發亟走上急擊之生擒數十人餘盡死駕還次玄石坡勒銘曰惟日月明惟天地壽玄石勒銘與之悠久銘擒胡山曰瀚海爲爐天山爲鏢一洗胡塵永清沙漠銘清流泉曰於鑠王師用殲醜虜山高水清永彰我武會軍士乏食上輟供御

散給之下令軍中許相借貸抵京倍償其直師賴以濟次開平張宴大醮將士醮已上乃肉食秋七月至北京冬還京師阿魯台遣使言欲輸款且言瓦刺不宜信瓦刺亦請乘阿魯台敗遂蹙之上兩答其意明年阿魯台累貢馬且請得部署女直吐番諸部上問左右多言許之便學士黃淮曰虜狼子野心散則易制合則難圖殆不可聽也上是其言曰淮如立馬高岡無遠不見諸人平地見目前耳遂不許而送其兄妹北歸蓋洪武中師至捕魚兒海俘來者是時阿魯台與本雅失里君臣已各部而居明年馬哈木等乘本雅失里弱滅之阿魯台上疏請爲故主復讐會馬哈木使來言滅本雅失里得傳國璽欲進獻恐爲阿魯台所邀請兵征之且多所陳乞上曰虜驕矣姑待之勞其使遣歸明年夏虜酋伯顏不花來朝亦請誅

瓦刺其秋封阿魯台爲和寧王母妻封夫人瓦刺貢遂絕明年三月上親
征瓦刺皇太孫從行安遠侯柳升武安侯鄭亨寧陽侯陳懋豐城侯李彬
分率諸軍都督劉江朱榮爲前鋒夏六月次撒里怯兒江遇虜與戰斬數
十人上度虜且大至申令嚴備恐虜有能漢語者盜吾營馬哈木等掃境
來戰見我師整頓山巔不敢發上令騎挑之虜奮迎敗死數百人我偏將
滿都力亦戰死都督馬聚被創甚上遙見麾鐵騎馳擊之虜大敗殺其王
子十餘人斬首數千級追至土刺河馬哈木遁去會日暮還營上語皇太
孫遲明當窮追此虜盡殲之太孫言虜已奔敗游魂假息不必追上從之
班師至飲馬河阿魯台遣其大酋以下來朝會而身稱病不能行上賜米
百石驢羊各百別賜其部落米五千石勅皇太子以班師告天地廟社仍

詔告天下七月駕還北京明年春馬哈木等貢馬謝罪語甚卑送還前所留使舍黑撒答兒等上曰黠虜乃巧言文過羣臣頓首虜禽獸不足較乃受獻館其使使者言馬哈木以阿魯台與中國歡將爲己害欲候冬襲之上勅邊將嚴爲備明年春阿魯台與瓦剌戰破之使使來獻俘上報賜仍及其將士未幾順寧王馬哈木死遣宦者海童往勞賢義安樂二王先是海童曾使瓦剌歸言所以拒命者順寧王之爲順寧死賢義安樂可撫也故上復遣之十六年春海童及瓦剌貢使至馬哈木之子脫歡請嗣父爵上復封脫歡爲順寧王而使海童及都督蘇火耳灰等以綵幣往賜太平把禿孛羅及其弟昂充別使使祭故順寧王自是瓦剌復奉貢而阿魯台貳初阿魯台降以迫瓦剌窘甚南保塞自歸上固曰虜黠詐窮來歸我非

其本心然天地之仁主覆育豈顧擇哉納而封之虜旣得休息生聚畜牧數歲益蕃富遂慢我使者或拘留之彼使歸肆行劫掠部落往往寇塞下上戒諭不悛二十年三月大入與和上銳意親征召問兵尙書方賓賓言餉不足未可興師問戶尙書夏原吉原吉對如賓語加切上不憚令原吉往視開平餉適刑尙書吳中入對復如賓上益怒逮原吉及中繫掖庭獄賓自殺禮尙書呂震譖賓等誣罔命戮賓屍幾欲殺原吉楊榮力救乃免遂命英國公輔偕六卿議餽運輔等議分前後二運前運半用車半用驢踵大軍行隆平侯張信尙書李慶等督之後運稍後大軍行俱用車保定侯孟瑛等督之共用驢三十四萬車十一萬七千五百民挽者二十三萬有奇運糧三十七萬石駕遂發五月次隰寧大閱將士製平胡三曲使士

歌之踰月至威遠川報虜攻萬全諸將請分兵還擊之上曰虜欲牽我耳
吾兵鼓行前虜自救不暇何暇攻我哉七月進次殺胡原獲虜部下言阿
魯台聞兵出其母妻罵之曰明皇帝何負爾而必欲爲逆天負恩事爾死
固宜吾屬何辜今虜矣阿魯台遂盡棄其馬駝牛羊輜重于闊灤海側而
身與其孥北走上命焚輜重收馬駝牛羊遂班師曰虜患邊驅之足矣吾
不欲黷武也顧謂諸將兀良哈我屬夷今顧黨虜亟剪之語在兀良哈傳
中八月還京師明年七月虜降者言阿魯台將入寇上遽召諸將諭之曰
虜意朕不復出宜先出塞待之伐其謀諸將皆曰善部分行寧陽侯陳懋
爲先鋒九月次西陽河虜知院阿失帖木兒古納台等率妻子來降言阿
魯台爲順寧王脫歡所敗部落潰散無所屬今聞大軍至率餘衆遠遁矣

乃官阿失帖木兒等爲千戶進次上莊堡先鋒懋追虜至宿嵬山不及遇王子也先土干率妻子部屬來降馳奏聞也先土干在虜中素雄黠自豪阿魯台忌之既見上慰諭甚至也先土干喜曰明皇帝眞吾主也封爲忠勇王賜姓名曰金忠官其甥把台罕爲都督冬十月班師發萬全上乘馬忠勇王騎從問以虜中事對稱旨復爲勅勞之所部皆舉手加額呼萬歲十一月至京師忠勇王數請擊虜自効上曰而休矣兵數動卽朕猶厭之況下人乎吾欲自戢也忠曰如邊人荼毒何上曰卿意善然事須有名漢文帝言漢過不先姑待之明年春正月開平守將奏虜盜邊羣臣勸上如忠勇王言遂親征夏四月發北京陳懋金忠爲先鋒出塞數千里至答口闌納木兒河不見虜英國公輔等願假一月糧深入誅之而上次開平時

夜夢神人言上帝好生者再學士榮幼孜乞承天意赦虜罪遂降詔諭其部落至是欲旋師乃諭輔出塞久軍士勞卿等且休矣朕更思之秋七月班師至清水源道旁石崖高甚顧榮幼孜刻石紀行曰使後世知朕征虜過此也次蒼崖戍不豫次榆木川上崩文皇帝凡五出漠北三犁虜庭中外勞費計臣凜凜虞乏軍興而虜緣大創本雅失里妻率屬來朝瓦剌襲封爵稱外臣阿魯台是後亦奉貢謹邊境少事矣宣德元年春賢義王太平死子捏烈忽嗣封三年秋上親巡邊大破兀良哈五年春以陽武侯祿議棄開平移城獨石始文皇帝世既棄興和及大寧至是開平復失宣遼道絕虜益迫內地而阿魯台瓦剌時相攻兵拏不解阿魯台敗上勅大同守將武安侯亨虜敗部曲離散卽來降宜嚴爲備未幾阿魯台攻兀良哈

敗之駐牧遼東塞下遣使入貢上曰虜貢宜自宣大入今乃從遼東非制其命守臣防之八年秋虜咎卜寇甘肅都督劉廣遣將敗之殺咎卜父子咎卜者阿魯台部酋也時阿魯台使來羣臣請拘之發兵問罪上曰阿魯台歸命久祖宗待之厚毋以細故廢前恩且部下逆彼不能制未可罪也禮其使璽書諭之明年夏阿魯台復爲順寧王脫歡所敗獨身逃使使來控上惻然遣使撫之是時脫歡強稍併有賢義安樂之衆急擊殺阿魯台悉收其部落欲自立爲可汗衆不可乃行求元後脫脫不花王爲主以阿魯台衆歸之居漠北哈喇噠等部俱服屬焉阿魯台子阿卜只俺乞歸附以爲左都督其冬脫歡使使來告捷言欲獻玉璽上賜幣令毋獻璽阿魯台旣死所部阿台王子朶兒只伯因竄居亦集乃路屢寇甘涼敗我兵睿

皇帝立累招之不從正統元年羣臣劾總兵官寧陽侯陳懋都督劉廣等縱寇罪廣坐掩敗上功械下獄餘罰治有差其夏虜酋脫脫木兒滿哥帖木兒率衆款涼州塞守將李安以聞上勅安毋以虜款弛備其秋命都督蔣貴率京兵征虜師出無功上命兵尙書王驥鄺埜廷議邊事越五日未奏逮驥埜下獄已而釋之明年春復命邊將方政史昭丁信楊洪等分道討虜都御史李儀言和寧殘孽窮無所歸乍臣乍叛小爲邊寇固自其常第嚴烽堠練士馬備之足矣不宜各棄所守窮兵遠出冒寒涉險幸一時功上曰儀言是然師業已行政等才足辦也已而皆無功其夏命尙書驥行邊得便宜行事都指揮安敬以罪戮徇軍中復坐虜入奪都督同知史昭一秩其冬命都督任禮爲平羌將軍都督蔣貴趙安副之尙書驥督師

勦阿台朶兒只伯明年夏禮貴破虜于石城斬三百餘級擒僞左丞脫羅及部屬百人金銀牌六璽印二馬驢駝牛四百餘兵甲衣裘稱是阿台與朶兒只伯以數騎遁去追破之梧桐林至黑泉而還僞平章阿的干以餘黨降趙安出他道復破之刁力溝擒僞右丞等三十人逐出塞千餘里虜衆幾盡論功封禮寧遠伯貴定西伯安會川伯賚驥等有差未幾瓦剌破殺阿台及朶兒只伯勢益張東誘兀良哈女直窺塞下亦時遣使來貢馬四年春勅諭其可汗脫脫不花王曰朕惟我太祖高皇帝兼愛中外待漠北尤誠信朕遵守不敢失可汗聰明仁智順天道遣使通好人民安樂此亦可汗祖宗愛民遺澤之所致也朕甚嘉之今遣都指揮康能等齎書幣往致朕意可汗宜益敦前好使命往來無間華夷一家將後嗣蒙澤可汗

名亦千萬世不磨可不念歟仍賜可汗諸衣服器幣及其右丞相脫歡等皆有賜未幾脫歡死子也先嗣稱太師淮王太師者虜握兵大酋號也是時虜衆皆服屬也先脫脫不花徒以元裔名爲君不相臨制顧妻也先姊以爲歡君臣竝貢我亦各賜勅答其意賞賚金帛甚厚久漸驕桀不恭貢使初止三五人後乃百人最後至三千餘人屢賜勅戒約毋過三百人不聽我濡忍納之使者亦暴橫往來殺掠道路恣要索稍不厭輒造釁端虜所請財物亦歲歲增至中國所無者我不能應虜顧益誘雜夷與其使偕九邊騷驛公私耗費又攻哈密執其王母掠沙州破兀良哈至脅誘朝鮮邊將皆知其必爲寇屢疏聞勅戒防禦而已不能絕也十一年冬遣使言往攻兀良哈歸且乞糧并欲見大同守奄郭敬上勅敬毋予糧毋得擅見

虜已復請更給順寧王印詔予之十二年虜使至宣府致脫脫不花及也先書于守將楊洪洪以聞勅洪禮其使報書申國家威德耳母嚴拒失虜歡時洪在邊頗有威名虜畏之故以書結洪頃之其部下阿兒脫台歸來言也先謀入寇脫脫不花止之吾屬受明恩何忍爲此也先言王不爲吾當自爲之吾以騎日蹂塞下彼田不得耕民不得息如此足逞也上屢因其使勅讓之也先益糾結諸胡使謀我貽書兀良哈謂爾祖父官皆元成吉思可汗薛禪可汗所授爾慎毋忘且責令供頓過軍兀良哈以聞詔問也先不報故事瓦剌使歸我使送至其地因留明歲與俱來使者往往以好語媚虜見也先奏胡樂則曰是安能及中國女伎耶吾他日來且請以賜若也先喜因爲其子請婚使陽應曰諾已謾之曰吾爲若奏上報許矣

也先乃大喜以得婚中國誇諸酋十四年春大貢馬爲聘朝廷曾未之知也答詔語不及婚則大媿怒七月遂盡發其種落犯諸邊脫脫不花王寇遼東知院阿剌寇宣府也先自寇大同至貓兒莊偏將吳浩戰死羽檄紛至奄王振用事顧自喜欲怙中國威重壓虜主親征廷臣伏闕爭之不能得踰二日駕遂行命郕王居守太師英國公輔等從軍事一聽振至宣府天大雷雨以風羣臣請止師振怒俱令略陣進次雞鳴山衆怙懼振威顧益張成國公勇等有所請事皆膝行尙書王佐鄺埜失振意罰跪草中竟日乃解振日督進師虜漸退伏塞外誘我欽天監正彭德清語振虜勢如此脫更進致疎虞柰萬乘何學士曹鼐亦力諫振皆不聽八月至大同奄敬密告振前行正墮虜計振乃議旋師諸將皆言宜從紫荆入振顧欲邀

上至蔚州幸其第已復虞蹂其鄉轉向宣府再越日乃發西寧侯宋晟武進伯朱冕與虜戰陽和口敗沒諜報虜踵襲我使恭順侯吳克忠拒之敗沒成國公勇永順伯綬以四萬人繼往盡沒克忠綬與虜戰皆力士卒盡克忠猶下馬跪射矢盡猶刺殺數十人與弟克勤皆死獨子瑾脫歸綬兵盡以空弓擊虜虜怒支解之旣而知綬本山後人相與哭之曰此吾類故勇乃爾次日至土木議入保懷來振顧私重不肯行遂至營地高無水師困甚欲移營以虜迫復止虜僞退營動虜乘之我師大潰英國公輔尙書佐學士鼐等皆死喪士卒數十萬輜重盡爲虜得上北狩報至京師震駭廷臣聚議戰守所宜侍講徐瑄依占象倡南遷侍郎于謙曰欲遷者可斬也請集勤王兵死守學士陳循曰侍郎言是衆和之顧皇太后尙疑奄李

永昌極言南宋事可鑒持守議益力皇太后悟勅邲王監國晉謙兵部尙書任以事羣臣廷劾振奸狀請族夷之王令俟處分羣臣慟哭請而錦衣指揮馬順者振黨也從旁呵止之給事中王竑直前摔順衆共毆斃之復索奄毛貴王長隨磔誅之衆譁甚王疑欲退謙前掖之慰諭羣臣散虜奉上至大同守將劉安郭登伏謁上命稍出錢犒虜諭登固守毋受虜欺軍校袁彬沒虜得侍上登遣人語彬欲奉上乘閒入城彬以聞上曰我命在天毋蹈險第語安報皇太后朕在虜中無恙亟具金帛迎歸耳安聞諸朝王詰責安此虜詐爾何輕聽後勿復爾上遂由大同出塞居也先弟伯顏帖木兒營伯顏俯伏跪拜執臣子禮甚恭九月王卽皇帝位尊上爲太上皇巡撫都御史朱鑑具陳禦虜方略首請罷奄監監軍帝嘉納之逮奄敬

下獄敬監大同軍與虜通歲造鐵鏃私遺虜陽和口之戰敬撓軍故敗至是逃還京論罪坐死詔禁錮之十月也先使人來議和還車駕賜勅答之數日自大同入犯紫荆擁上皇南從閒道攻關破之都御史孫祥死進薄都城宣言索大臣王直胡濙于謙等出迎駕衆知虜詐不出於是以通政參議王復中書舍人趙榮充九卿如虜師朝上皇也先謂爾等皆小官亟令直等來上皇密諭復榮彼無善意宜亟歸是日虜焚三陵殿寢門游騎四出掠下邑朝議欲鍵九門清野以老敵尙書謙曰不有戰何以守乃親擐甲先將士出反闔德勝門而軍示士卒必死燔城外積芻毋資虜訶知上皇駕移遠虜營乃發礮擊虜死者以萬計總兵石亨力戰彰義門又敗之都督孫鏗王通合擊又敗之虜勢沮而諸勤王兵以次集於是謙榜各

門募蕃漢軍能擒斬也先首獻者賞萬金爵上公也先內懼逡巡遁而使使來言欲還上皇請罷兵報詔太師且奉朕兄歸意良厚顧部下多剽掠朕所以發兵備他盜耳太師如戢兵以數騎護歸上皇朕亦遣數騎迎彼此解甲相和好固朕志也復勅勞伯顏帖木兒朕兄在營知院供具無闕敬謝知院是日伯顏帖木兒奉上皇駕出紫荆關石亨躡虜清風店大破之昌平伯楊洪都督孫鏜范廣陶瑾等分道捕畿內餘寇破逐之上皇駕出塞脫脫不花王遣使來貢大臣請禮其使以閒也先從之也先土木之勝意輕中國且挾上皇爲重質邀索無已尙書謙颺言社稷爲重君爲輕以塞虜望而先是虜過大同帥郭登亦登城告虜賴天地宗社之靈國有君矣虜旣失所挾又見中國全盛城池深固人心憤懣稍稍悔禍事上皇

愈益共奉居得知院營閒數日輒設宴妻妾行酒身自彈虎撥思兒踏曲以佐歡上皇雖狩虜意氣故自如未嘗有所降下虜時望見所居帳夜有光龍文交騰雨雪不凝大驚異大酋咸頓首伏謁稱中國聖人也先數薦女弟侍上皇固卻之愈敬服謀奉駕歸矣景泰元年春誅逆奄喜寧喜寧者胡種也降虜見親信日導虜入寇虜薄都城及邀大臣迎駕皆其謀上皇患之計不誅寧虜不靖乃命袁彬請也先遣寧至京軍校高鑿與俱密繫書鑿肘令邊將計擒之至宣府被獲械赴京論功晉參將楊俊爲都督鑿副千戶上皇聞寧擒大喜謂歸南有日虜旣失寧無與導謀益衰息然遲我迎上皇徘徊塞上時入虜掠雲中上谷間我使久絕其衆皆思歸大酋阿刺知院遣參政完者脫歡來具言欲和不得報且入寇報詔虜必盡

出塞乃可和不然朕不惜戰也完者脫歡復來請脫脫不花及也先使亦至秋七月乃遣禮侍郎李實少卿羅綺指揮馬顯偕完者脫歡報使并問上皇起居實等見上皇泣上皇亦泣問三宮安否將來何物實頓首言本以通問來無所將上皇曰此細故不足論卿第歸語朝廷圖迎我歸守陵墓足矣也先語實我留皇帝無以爲數請迎歸不報何也實反覆曉譬欲奉迎也先言汝修通問耳何遽言迎其亟遣大臣來大臣朝至駕夕發實歸具言之時已遣都御史楊善右侍郎趙榮使虜使指不及迎廷臣累請如實言更遣使帝終不許善至也先爲言南北和好久柰何拘我使臣減賞賜自生釁端善曰爾父在先朝貢使不過數人寡求請所以能長好爾使且三千人閒有奸中國法潛逃非我拘留賞賜第覈其虛者何言減也

也先曰者胡語云者然辭也善度也先意稍動因言太師爾忘明皇帝之大恩乎而以小人言失累世歡天道好生爾好殺宜早戢兵毋逆天生災也先曰者者因問皇帝歸更踐祚否善曰天位已定不可易也也先曰堯舜禪受何如善曰上帝以兄傳弟正法堯舜耳也先不能難第言汝迎天子將何物善曰吾以賄來太師其將被此名也無賄而有令名何利如之也先大然之其日引善見上皇遂設宴餞自彈琵琶妻妾前觴顧善曰都御史坐善不敢坐上皇曰坐善乃坐仍起周旋也先嘖嘖羨有禮次日伯顏帖木兒餞次日駕行也先築臺設上皇座率衆拜辭妻妾亦拜辭也先復自送數十里慟哭辭去遣得知院送至野狐嶺亦慟哭辭平章昂充射得一獐追來獻八月駕抵京居于南宮自是虜貢不絕屢請報使尙書王

直偕廷臣請許之制曰正統閒使通虜幾危宗社今朕方思與虜絕卿等第謀所以富國強兵雪讐耻稱朕意焉母復言使虜事尙書金濂胡濙相繼言虜向化誠不報且生釁其何靳一介行李踐虜庭稍慰其望濂復引高帝以三十萬衆困平城以爲戒制曰使母往朕志定矣平城事非所宜言於是勅可汗前者使往小人言語短長傷和好兩國人民咸罹災害此亦朕與可汗所共知也可汗今請答使朕恐蹈前失不復遣可汗使皮兒馬黑麻等朕皆優禮厚給馬直遣歸自今使來朝貢者聽然亦須人少賞賜乃得厚朕終始不食言別勅也先指如之三年春尙書謙侯亨請出塞討虜帝曰師行勞姑待之時脫脫不花與也先不相能所妻也先姊生子也先欲立爲太子脫脫不花不從也先亦疑其主與中國通害已遂治兵

相攻不花王敗走依兀良哈弒死也先盡收其妻子殺元裔幾盡都督楊俊言也先弒逆吞併諸部東至女直西至赤斤蒙古皆受約束不誅爲患滋大請悉各邊兵出塞擣其巢一大創虜下本兵及諸將議尙書謙言虜誠當誅但邊兵盡出虜且乘吾虛非計詔從謙議會也先使來尙書王直等復請答使詔問謙謙言臣職兵戎知戰而已使事不敢聞制曰謙言是使勿遣制詔也先太師求答使朕固欲遣第恐更如往者構是非無益反滋害故不遣人來者乃至三千餘邊將請謝絕朕念太師誠款姑聽後少遣臨遣時與總目關會得爲詐冒防諸正副使已陞都督都指揮指揮千戶等官厚賞賜市易者悉聽車輛送至境太師其體朕意毋忽當是將虜使驕毆守衛掠人財物至欲騎入長安門稍約束卽彎弓相向我以通好

故不能問也十月也先使來稱大元田盛大可汗致書皇帝往者元受天命主夷夏今已得其位盡有其國土人民傳國玉璽敬遣使修好仍通懇勤上皇田盛者華言天聖也下其書禮官集廷議報書云何都給事中林聰御史徐正言宜勅也先諭以順逆毋從其僞稱安遠侯柳溥言宜仍稱瓦剌太師入犯則討之并下禮官議議言古王者不治夷狄以爲不足治也也先所稱固不可盡從若可汗乃隋唐以來北狄酋長之通稱非中國所禁勅書宜稱爲瓦剌可汗示羈縻使郎中章綸言可汗在中國固夷酋之常稱在戎狄則帝者之位號觀其上唐太宗爲天可汗元世祖爲成吉思可汗可見矣向脫脫不花乃元世傳稱名猶近正今也先弑主僭號名實大舛若因而稱之彼以爲中國天子亦稱我可汗得誇示羣酋羣酋讐

服且遂爲中國患莫若賜勅別封爲敬順王或瓦刺王便詔從廷議稱瓦刺可汗也先旣新立恐諸部不從欲通好中朝其弟賽因孛羅魯王諸酋皆貢馬稀復深入爲寇矣而我所賞賜虜費亦不貲未幾知院阿刺攻也先殺之始阿刺欲繼也先爲太師也先不許阿刺怒遂隙也先淫酗殘虐諸部皆貳愈益忌阿刺佯飲其二子酒毒斃之阿刺率所部攻也先數其三罪曰漢兒血不花王血兀良哈血皆在汝身天道好還行及汝矣也先未卽戰而與所厚酋伯顏帖木兒得知院等議帳中其知院禿革帖木兒掌判阿麻火者故阿刺部也共刺殺也先并殺伯顏得知院或云也先戰敗從數十騎逃已復棄其騎困甚從一婦人乞漿婦人飲之酪遂去夫歸婦言狀夫疑其爲也先追殺之也先死諸部離散竄居西北邊離合不常

瓦剌稍衰矣阿剌後亦失所終而孛來爲雄長稱太師復求故可汗脫脫不花子尊立之號小王子自是虜以小王子爲尊稱而毛里孩阿羅出諸酋相繼奮咸爲邊患睿皇帝復辟念居虜中時伯顏帖木兒有保護功遣都督馬政齎綵幣賜其妻孛來留不遣而使皮兒馬黑麻入賀言欲獻璽賜勅詰責留馬政罪且曰璽非眞卽眞秦物耳朕不貴也獻與否惟爾馬政亦自虜中代孛來乞糧不許天順二年春孛來大舉寇陝西安遠侯柳溥統兵禦之輒敗猶時節小捷聞御史劉濬劾溥溥行賄得釋濬謫官已而虜大熾關中震動乃召溥還奪太傅明年春正月虜入大同定遠伯石彪破走之都督周賢都指揮李鑑戰死其秋復寇大同守將安陽伯李文避不敢出虜直抵鴈門忻代殺掠甚衆烽火達于京師邊民大擾遣都督

顏彪馮宗率兵屯紫荆倒馬二關爲聲援虜益肆往來自如勅二關兵出
鴈門虜始退明年春寇延綏榆林守將彰武伯楊信拒卻之明年夏寇河
西守將仇廉禦之敗績遂渡河大掠關隴震動懷寧伯孫鏜兵尙書馬昂
率京兵及河南山東兵西征會曹欽反闕下昂討賊有功不果行而侍郎
白圭都御史王竑相繼出禦虜其秋孛來三上書求款廷議請遣使撫諭
乃命指揮詹昇齎勅諭孛來曰比邊臣奏太師書言通好事朕已悉知朝
廷故與北邊往來無閒負約構怨常在北邊今歲復掠我河西邊將追捕
兩致殺傷廷臣咸請大發兵誅討朕以生靈故謝罷羣議太師書中亦言
愛惜多人性命朕與太師旣同此意故使使往諭太師自今其棄細故行
大道散遣部落毋爲邊患使來賞賜朕不爾吝齎往綺幣至可領也其冬

孛來遣納阿出等隨昇來報命且請從陝西入從之未幾復糾毛里孩入河西賜詔責讓令貢道仍由大同毋趨陝明年使至大同詔守將彰武伯信虜名貢其心叵測且有三千人伺塞下宜善爲備仍勅虜使察占母多挾人來留其餘塞下官餽之聽與邊人交易孛來上書言已爲諸部長賞賜不宜等諸部禮臣言孛來賜視諸部大溢獨其君小王子與之同虜貪且蔑君臣分以此怏怏宜稍塞其意詔增幣一龔未幾小王子沒或云孛來弒也虜共立其兄脫思爲主稱馬可古兒吉思王子遣使入貢賜勅招諭之成化元年春王子與孛來並貢復求報使不許頃之孛來誘兀良哈九萬騎入遼河武安侯鄭宏拒卻之其冬寇延綏命彰武伯信率大同兵御史項忠率陝西兵禦虜皆無功虜諸酋亦內爭孛羅忽者結毛里孩阿

羅出者結訃加思蘭各樹黨相攻出沒河套中河套古朔方郡饒水草其
外爲東勝唐張仁愿築三受降城國初嘗守之兵民耕牧套中自東勝而
外地平衍虜來一騎不能隱以故避不入後以曠遠徙弗居至是遂爲虜
巢邊民亡命者時導虜入掠邊事日亟而孛來勢分復爲毛里孩讐殺稍
衰矣訃加思蘭亦虜別部居哈密北山天順末始盛侵掠哈密雄視諸番
我因其貢羈縻之竟東渡河與虜合二年夏大入延綏適大學士李賢言
虜據套近我邊我出彼歸我歸彼來禍無休已宜令各邊守臣簡精銳窮
巢穴驅而去之一勞永逸國家雖費不可以已也乃使彰武伯信爲平虜
將軍都督趙勝副之率京兵萬人諸邊兵合萬人往擊虜未至虜入固原
都指揮林盛戰敗詔促信行信至邊虜退其冬復入延綏參將湯胤勳敗

死明年春毛里孩乞通貢制曰無約而請和者謀也其令各邊謹備虜毛里孩不得貢則渡河東侵大同廷議楊信兵少不足制虜於是以撫寧侯朱永爲平胡將軍率京兵往都督劉聚鮑政副之會毛里孩再上書求貢許之詔永駐軍代州先是毛里孩已攻殺孛來弒其可汗馬可古兒吉思虜更立可汗毛里孩復弒之并逐少師幹羅出自稱黃芩王別酋孛魯乃稱齊王竝遣使貢而瓦剌也先之子阿失帖木兒者亦來貢使者顧挾兀良哈夷由喜峰口入故事宴勞北使優於他夷至是以其混兀良哈使來且入喜峯口非制乃以夷使禮禮之虜使恚有違言通事諭之故上書服罪乃遇以故禮禮部言阿失帖木兒兩月閒使進貢者二又不循故道殆其結各虜徑近狎至以窺邊宜遏絕其奸於是賜勅言自爾祖脫歡而來

朝貢信使有常時往來道路有常處未嘗雜引他夷生事端故朝廷待之不疑今爾貢兩月再遣又同朶顏使從東來朶顏卜刺俱我屬衛朝貢有節今無故糾以來非法也爾自今其體前人心歲冬農隙時聽遣使使毋過三四十人仍從大同入朝廷得一意款待毋傷世好長久之計也瓦刺自也先死後數歲戡至是復稍張與毛里孩諸酋拏兵爭雄長諸酋亦坐是不得并力於我未幾有滿四之變滿四本名俊故元平涼萬戶把丹之孫也國初虜降者皆處以邊地謂之士達俊處涼州三岔溝號滿家營有衆數千人時出行劫邊將墨其財俊厭苦之會其黨事發詞連俊四年秋遂據石城爲亂石城天險卽唐吐番石堡城王忠嗣所謂非殺數萬人不能克者也寧遠伯任壽廣義伯吳琮合兵三萬擊之大失利於是命都督

劉玉都御史項忠征之忠圍困其城數月不下伏羌伯毛忠指揮周璽費澄俱戰死廷議謂賊未平且勾虜滋蔓請濟師大學士彭時持不可明年二月俊黨楊虎霧降誘俊出戰擒之并其黨磔于市始俊計事敗且入虜以圍急不得出比俊誅邊將已報虜入套窺邊矣其冬阿羅出糾兀良哈寇延慶於是撫寧侯永爲平虜將軍都御史王越督師往延綏禦虜永至邊以捷聞論功越等俱陞賞永世侯而虜據套自如邊郡大擾七年冬召永還以邊事委越及總兵許寧而使侍郎葉盛行邊會虜入敗參將錢亮寧不能救兵部尙書白圭請大發兵搜套盛至邊條上築堡增兵諸事謂搜套師未易輕舉盛還圭請集廷議議言套虜不驅邊患無已第邊兵多而無統是以屢衄宜擇遣大將付以閩外得專事虜於是以武靖侯趙輔

爲平虜將軍悉部署諸路王越仍督師虜大入延慶輔不能禦未幾稱疾
召還以寧晉伯劉聚代之聚未至虜相繼掠固原延寧諸處邊臣屢疏聞
詔讓輔越玩寇罪延綏巡撫余子俊建議埤山築牆設墩臺砦堡以制虜
從之虜自是不敢大入延綏毛里孩孛魯乃阿羅出三酋亦稍衰敗而滿
魯都入河套稱可汗卍加思蘭爲太師九年秋九月與孛羅忽竝寇韋州
王越偵知虜盡行老弱巢紅鹽池可取也乃與總兵許寧遊擊周玉率輕
騎晝夜馳三百餘里襲擊之擒斬三百餘級獲雜畜器械甚衆盡燒其廬
帳而還虜自據套以來無歲不深入殺掠人畜至數千百萬邊將擁兵莫
誰何徼所遺老弱及殺吾民以上功冒陞賞三遣大將朱永趙輔劉聚出
師大抵効邊將故習虜益橫內地且自危用事者始議搜套聚兵八萬糜

資儲無算頻歲師不出至是捷虜內失其孥相與悲泣渡河北去患少弭已復稍稍東寇宣大遼東誘兀良哈爲導十一年秋滿魯都札加思蘭並遣使貢未幾復相讐殺始札加思蘭以女妻滿魯都欲代爲可汗恐衆不服謀殺滿魯都而立幹赤來爲可汗滿魯都知之索幹赤來札加思蘭匿不與攻逐滿魯都併有孛羅忽之衆滿魯都部酋脫羅干亦思馬因復攻殺札加思蘭亦思馬因稱太師自札加思蘭死虜數歲稀入寇大璫汪直恃寵喜事數握兵徼戰伐功王越朱永附和之諸大臣心知其非不敢爭十六年春邊報至遂命永爲征虜將軍直與越俱督師出塞捕虜先是永征建州越不與以爲恨至是越聞套虜有居威寧海子者給永由他道身與直率輕騎乘雨雪襲擊之斬首四百餘級擒百七十餘人班師論功封

越威寧伯越有智略其用兵能以奇取勝徒以附直故爲世所訾是後屢與直奉命出師十八年春禦虜于延綏小捷賞賚甚衆虜亦益盜邊不休明年夏入大同諸堡殺掠人畜數萬守將許寧以捷聞虜旣得利長驅入順聖川散掠蔚朔諸州烽火徹于圻內宣府巡撫秦紘總兵周玉力戰卻之虜去輒復來至成化末迄無寧歲而是時滿魯都已衰弱不知所終其入寇者復稱小王子或稱把禿猛可王卽故小王子後也與其太師亦思馬因不協頗相攻二十三年哈密都督罕慎報太師亦思馬因死而瓦剌有兩太師一克捨一革捨克捨死其弟阿沙赤爲太師革捨弟阿力古多與相讐殺西走掠哈密當克捨時嘗以小王子遮絕貢道請借兀良哈兵襲之不許小王子死弟伯顏猛可代爲小王子弘治元年夏小王子奉書

求貢詞稍慢自稱大元大可汗下兵部廷議之英國公張懋等言虜僭名號自其故態不足誅卽先朝亦嘗寬假宜令守臣納其使從之伯顏猛可立以年幼恐太師專權遂不復設太師與瓦剌屢入貢時馬文升在兵部許進巡撫大同皆習邊事進疏至輒得請戎備修又數貽書小王子言通貢之利虜奉約謹不敢大爲寇故當弘治初諸邊稀虜患異成化時矣其後乃有火箭火箭者脫羅干之子小王子部落也狡黠善用兵劫諸部屢寇邊獲財畜日強盛跋扈與小王子爭雄長邊患復熾十年冬寇肅州巡撫吳珉不能禦以王越鎮陝節制諸軍越已奪爵起自田閒明年秋越率師襲賀蘭山後虜破之明年虜寇榆林寧夏大同皆殺掠多明年春寇威遠遊擊將軍王杲敗績右參將秦恭副總兵馬昇逗留不進皆論死其夏

連寇大同總兵王璽等失亡多命平江伯陳銳及侍郎許進率師禦虜銳
畏怯遇虜不敢戰嬰城自保罷還以保國公朱暉代之進亦致仕去虜猖
獗甚京師戒嚴分遣文武大臣守潮河川天壽山居庸紫荆倒馬白羊諸
關以都御史史琳督師大同虜解去明年春迭入延綏守臣屢告急復命
保國公暉都御史琳統諸路兵西禦虜奄苗達監軍暉行至河套襲虜斬
三級驅牛畜數百歸賞賚有差廷臣屢言功薄不當賞報聞虜分道掠固
原寧夏諸邊輒從花馬池入西北大擾暉等不能禦都給事中屈伸疏劾
之詔讓暉因召還以秦紘督師鎮陝紘至邊大治塹築堡虜稍靖十七年
夏六月歸正人報虜有異謀上召大學士劉健李東陽令譯審虜情因諭
以京軍當恤督將須得人健東陽頓首朝廷養兵衛畿輔而工役煩多耗

士氣非制宜釐其弊上納之時天子仁聖孜孜求治憤虜桀驁欲一創之會其秋虜入大同殺墩軍上遂召健等議出師討虜曰墩軍皆吾赤子虜殺之不道宜問罪臣健對陛下垂念赤子德至厚然兵危事未易輕動上意未釋臣遷言邊事急孰與京師疲內以事外非完策臣東陽言北虜與朶顏通潮河川古北口去京師一日而近虜若道此而我軍顧遠出大同東西奔走自弊之道也上曰兵卽未遽出宜蒐乘蓄備以需皆頓首曰善已召兵尙書劉大夏諭如初大夏亦力言未可上曰太宗時師行頻往輒摧虜今何以不可大夏曰太宗時兵餉足將士經百戰足辦虜故利也今承平久人不習兵餉又乏陛下試度何如太宗時師出之日非獨不能制虜徒毒擾邊人耳上憮然悟曰朕幾誤計乃寢師然猶拜朱暉爲征虜大

將軍苗達史琳督師豫簡京軍俟報至乃行而使都御史閻仲宇往大同通政參議熊偉居庸關督餉虜引去暉等罷行明年春虜三萬騎圍靈州詔督諸鎮兵往援虜圍久不克解去散掠內地總兵李祥偏將仇鉞擊走之敬皇帝崩踰月虜大舉寇宣府總兵張俊分遣諸將禦之皆爲虜所圍俊疾救解遊擊將軍張雄穆榮敗沒士死傷數千失亡人畜無算復命苗達朱暉史琳出禦虜都督李俊神英都指揮陳雄張澄佐之皆無功言官劾暉等老師費財徵還其冬虜入鎮夷所指揮劉經死之復自花馬池毀垣入掠隆德靜寧會寧諸處再旬乃退關中大震陝西巡撫楊一清疏言諸將觀望莫相救致虜深入多殺傷宜擇大臣節制諸路令乃可行詔以一清爲總制時正德元年春也一清條上修邊諸事行之會逆瑾竊柄輔

臣本兵相繼逐一清旋亦致仕去諸奄四出稱守備監軍暴螫行間邊事益困矣三年春虜近塞下命兵部侍郎文貴開府督師貴所請度支金錢巨萬名修邊費然半輸瑾所虜殺掠男婦數千雜畜器械倍之莫誰何明年夏命工部尙書才寬節制延寧甘肅諸軍貴專督宣大其秋虜伏大衆於延綏塞下遣輕騎攻新興堡副總兵侯勛禦之伏起被圍會救至虜解去喪馬二千七百餘匹殺傷略當寬以捷聞其冬虜入花馬池寬禦之敗死總兵馬昂與別酋亦孛來戰于木瓜山諸處頗有斬獲其年亦不刺入西海亦不刺者小王子丞相也小王子與火篩讐殺火篩死復以他事怒亦不刺欲殺之亦不刺懼擁萬衆掠涼州攻破安定王等族奪其誥印諸番苦之西海自是始有虜別部阿爾禿斯與亦不刺合日與小王子尋兵

敗則掠邊破堡寨五十餘殺兵民千餘雜畜糧械失亡無算守臣輒以捷聞七年秋遣人至肅州求邊地住牧且請婚哈密議欲遂招之以扞虜不果明年夏再來請甘肅巡撫張翼瓘以金帛令遠徙虜遂掠烏思藏據之轉掠松潘洮岷無寧歲小王子復屢入宣大塞殺掠慘于西陲守將潘浩等不能禦罰治有差八年夏五萬騎由大同入犯寧武倒馬諸關山西守臣請調他鎮兵戍大同者還守關兵部議寧武三關所以蔽山西而大同所以蔽寧武也若專守寧武是自撤藩籬非計大同兵宜無動而別調內地兵戍寧武從之以咸寧侯仇鉞總兵禦虜鉞至大同屬虜寇萬全衛與戰於沙河失亡多以捷聞未幾奏虜退召還明年秋小王子入宣大塞別部自懷安入順聖川遊擊張勛守備田琦廉彪戰死總制都御史叢蘭告

急詔奄張永督宣大延綏兵都督白玉爲大將軍協蘭禦虜他將皆屬分遣撫寧侯朱麒等守古北口及紫荆諸關永等多挾從人請乞煩未出國門已費度支金錢十餘萬卒無功蘭玉與虜戰于平虜城南潛置毒飯田閒如農家餉虜食之多死明年秋十萬騎入固原塞明年夏入大同塞詔都督劉暉侍郎丁鳳率師禦之虜突入白羊口大掠而去未幾復以七萬騎分道入總兵潘浩與戰于賈家灣敗績都指揮朱春指揮王唐戰死浩再戰再敗虜遂犯宣府殺掠無算浩奪三官諸將罰治有差十二年秋五萬騎入大同塞屬天子以遊辛至陽和親部署諸將禦虜總兵王勛等遇虜於應州爲所圍上督兵援之衆殊死戰虜稍卻會暮休營明日虜來攻自辰至酉戰百餘合虜引而西追至平虜朔州會大風黑霧晝晦上乃還

是役也獲虜首十六級我軍死傷數百乘輿幾危上命守臣告捷於朝駕還羣臣迎賀賞賚有差是後虜雖歲犯邊然罕大入小王子死有三子長阿爾倫次阿著次滿官嗔阿爾倫前死二子長卜赤次也明皆幼阿著稱小王子未幾死衆立卜赤稱亦克罕克罕猶可汗也然亦稱小王子如故嘉靖元年入花馬池大掠西安鳳翔三年秋大同巡撫張文錦以鎮城孤懸迫虜築水口等五堡遣卒二千五百家戍之卒憚行參將賈鑑督之嚴叛殺鑑及文錦多走出塞降虜明年屢入陝西諸塞殺吏民亦不刺復駐牧賀蘭山後出沒擾邊詔起楊一清爲總制一清議勦尙書金獻民議撫會王憲代一清乃下憲議憲亦言逋虜不大創患無已時已勒所部待師期詔憲慎防守毋輕出塞六年春虜連寇宣府參將王經關山俱戰死其

秋數萬騎入寧夏塞王憲督總兵鄭卿杭雄拒卻之斬首三百餘級明年春掠山西其冬五萬騎掠宣府總兵趙瑛等拒卻之已復大掠陽和至朔州指揮趙源戰死明年春數萬騎入寧夏塞杭雄禦之敗績遂由鎮羌入西海與亦不剌結親謀內犯時王瓊代憲益修邊虜亦稍卻未幾召還唐龍代之十一年虜款延綏塞詔卻之遂擁十萬騎入寇總制龍請許貢以紓患上曰虜負罪宜討大臣當戮力振國威乃取目前計縱虜耶龍連戰頗有斬獲虜以數萬騎渡河而西襲卜兒孩大破之卜兒孩者亦小王子部落遁入西海與亦不剌阿爾禿廝共患邊者也明年秋虜窺大同塞總兵朱瑾議浚濠塹遏虜騎大同卒素憚瑾治軍嚴因是役也遂亂攻殺瑾總督劉源清欲盡誅諸亂者卒愈囂嬰城叛遺小王子金幣女伎日中土

饒可帝勝沙漠也指代王宮曰以此爲那顏居小王子勒兵應之遊騎至應朔諸州旋解去亂亦隨定是時小王子最富強控弦十餘萬多畜黃金犀毗稍厭兵其連歲深入蹂西北邊皆其別部酋曰吉囊曰俺答二酋亦元裔于小王子爲從父行其大父曰歹顏哈有十一子次日賽那刺有七子長吉囊次俺答皆雄黠善兵吉囊壁河套名襖兒都司直關中俺答壁豐州灘直代雲中吉囊俺答各九子子各萬騎其弟老把都亦數萬騎壁張家口諸昆從百十皆有分地率盜邊自肥日益強盛名尊小王子不受其約束小王子亦徙壁東方直薊遼號曰土蠻異種黃毛者兇悍不能別死生衆少於三部虜或時深入黃毛輒從後掠徼取子女玉帛虜苦之因合兵急擊大破臣黃毛以是無內顧得專事我十三年春入延綏秋入花

馬池掠固原殘安定會寧二縣總兵王効副總兵梁震禦之斬首二百餘級虜東犯大同十五年秋復入延綏總督劉天和督諸將禦之斬首百餘級明年春入甘州大掠已分掠東西諸塞無寧日每入大率十萬少亦數千諸將莫能禦獨大同總兵梁震數以家丁劫虜有功虜畏之震死家丁多走降虜十八年秋虜寇宣府逮總兵江桓下詔獄明年春入延綏奪總兵周尙文俸其秋大掠宣府至蔚州堡寨盡破總兵白爵遇虜于水泉兒大敗副總兵雲冒再遇馬連堡又敗留兩月乃退巡撫楚書以捷聞西虜復掠固原會大雨道濘虜騎困弓矢盡膠劉天和與戰大獲殺吉囊子小十王捷聞上喜甚天和及諸將周尙文等皆增秩并錄輔臣本兵功諸賞賚甚渥明年秋虜遣使石天爵款大同塞巡撫史道以聞詔卻之以樊繼

祖督宣大山西三鎮兵抗虜翟鵬督餉兼督畿南兵爲援虜不得請遂大舉內犯吉囊先由白泉口長驅至寧武關石湖嶺副總兵丁璋力戰死繼祖堅壁不敢戰俾遊擊將軍周宇禦虜太原北死之虜越而南殺掠萬計至平遙居民培白挺與格虜有斃者以故卻而俺答復入又越太原至石州殺掠益甚浸淫平定壽陽閒矣言官交章劾繼祖竟不罪罷歸召翟鵬還已復使督宣大兵二十一年虜使石天爵再至邊臣誘殺之以功受賞俺答怒入塞大掠山西殘傷四十州縣殺掠二十餘萬雜畜二百萬衣襪金錢稱是焚公私廬舍八萬區踰月乃出塞諸將觀望莫敢戰獨參將張世忠躡虜鬪甚力死之時吉囊虜忻代妓淫日夕卒死俺答益張二十三

年十月自萬全右衛深入內地言者謂撤防秋兵太早上怒逮翟鵬及薊

州巡撫朱方下詔獄杖死以翁萬達代鵬萬達有計略詰邊蒐卒次第修諸牆堡戎備大飾明年秋虜以數萬騎犯鐵裏門鶻鴿谷萬達分軍爲二故帥張達將左部故偏帥張鳳將右部達戰鐵裏門虜卻鳳戰鶻鴿谷殺傷大當虜欲解去已憤曰南軍不數百我以數萬返何以復軍乃益合圍殺鳳磁人王邦直素負勇力提大刀入陣獨殺數十人竟鬪死軍沒然虜亦大懼明年復使使求款邊卒狃前事殺之萬達請治殺使罪紓虜忿且言虜款堅宜羈縻制之毋絕不聽陝督臣曾銑謂虜巢套中近塞下不驅之邊患不休銳欲復套料兵實具方略疏請大學士夏言主其議上業報許而大學士嚴嵩素與言相軋思有以中乃乘閒訐言受銑金妄議興師開邊釁貽社稷憂故帥仇鸞嘗以貪暴爲銑劾繫獄嵩嫉之疏銑諸不法

狀上大怒逮銑誅之并誅言自銑死後無敢言復套事矣二十七年秋虜入大同塞萬達策虜趨鎮安堡使總兵趙卿駐焉虜佯攻獨石卿違制悉兵走獨石虜遂踰長安嶺掠隆永得利去詔罷卿貶萬達俸二秩明年春虜犯宣府滴水崖萬達先謀知之乃檄大同總兵周尙文曰虜且東二鎮相援制也其以兵趨滴水失期者罪無赦又虞尙文不時至則具疏請尙文得旨介而馳未至裨將董暘江瀚力戰死亡其軍尙文遇虜曹家莊大戰敗之虜恃衆不退益治兵攻圍三日萬達計曰戰久矣兵必疲不援尙文是棄師也率衆鼓行前虜走出塞已復寇拒牆堡尙文以車兵敗卻之尙文卒張達代萬達召還郭宗臯代明年夏虜入大同塞達禦之虜爲三覆待我達恃勇不戒中伏力戰死副總兵林椿援達亦死達椿皆驍勇敢

戰邊人惜之事聞逮宗臯等罰治有差以仇鸞帥大同其秋虜至鎮鸞使其黨時義賄虜令東寇薊薊山外界虜恃三衛藩焉至是三衛反導虜深入至古北口詔發京邊兵數萬守要害邊兵發虎符遠不時會京兵烏合不任戰虜攻古北口都御史王汝孝悉力禦之稍卻虜分騎閒道出師後我兵大潰虜大殺掠懷柔順義吏士無算游騎至通州京師震恐集諸營兵壯者出邊敗死悉老弱不過五六萬而諸內使厮徒負養在其中矣倉卒從武庫索甲仗武庫奄不時發久之未能軍兵部尙書丁汝夔始以聞上大驚詔侍郎王邦瑞定西侯蔣傅督九門門各守以文武大臣集武舉千人隸焉別募良家子蒼頭義軍垂四萬登陴咸寧侯鸞保定巡撫楊守謙俱以兵至諸勤王兵先後至上內視稍彊拜鸞爲平虜大將軍諸道悉

屬進守謙兵部侍郎督師釋故參將戴綸歐陽安等繫令從軍自効虜至通州阻白河御史王忬先已悉收舟楫不得渡越數日乃西薄都城獲奄楊增等令持書來曰予我幣通我貢卽解圍不者歲一虔而郭時天子坐西齋宮望烽火四起憂之無所出召大學士嵩禮部尙書階問虜事嵩言此掠食賊不足憂階言宜以計緩虜令出塞待命乃款如此往復冀少遲我兵集虜可破也上命集廷議廷臣相視莫敢發司業趙貞吉抗聲言北虜無狀至震動勾陳柰何爲城下盟第錄故帥周尙文功出沈束于獄捐帑金百萬以百金易一虜不効貞吉受其咎時束以理尙文功得逮故也檢討毛起言虜近姑許之而後寒之若何貞吉怒衆叱之上聞壯貞吉擢左諭德兼監察御史稱詔齎五萬金勞行營將士大將軍鸞計難貞吉拒

不受益縱部士辮髮冒虜掠村落有司捕獲不敢法疏請上念大同卒首勤王卽有罪以迫饑困置勿問第付鸞自治兵部遂下令勿捕有捕至反笞捕者卒愈益驕患甚于虜衆藉藉歸怨汝夔矣汝夔顧語諸將虜方盛未易得志計無如守諸將畏虜諉言汝夔禁不敢發語浸上聞而守謙亦恐戰未必利少挫且張虜約勒部士毋輕動虜縱掠近郊至西山中貴人園宅別業多焚蕩環泣上前謂汝夔守謙右虜左士使異類縱橫殘神鄉上震怒逮二人下獄戶部尙書李士翔坐徵發不給褫職冠服視事虜剽得子女金帛無算意欲滿乃循諸陵而北徜徉去欲奪白羊口大將軍鸞以十萬衆尾虜不敢擊卒與遇潰鸞幾爲虜擒裨將戴綸徐仁力戰乃免虜東循潮河川由古北口出諸將斬遺稚弱八十餘級詐增鹵獲稱飲至

汝夔守謙竟坐誅貞吉亦以報命失上意杖謫詔鸞督京營兵鸞議京營兵脆不習戰請徵諸邊銳士集京師爲重兵部議是撤垣牆蔽堂奧非策卒從鸞議鸞意氣日盛擅自議語署置所上疏卽報可不下部尙書王邦瑞力爭不可祖宗無是法毋啓跋扈端不聽邦瑞尋罷去虜旣歸會疫病人畜多死所掠皆歸部落稍中悔大將軍鸞懼虜且復至陰使人啗以開市其冬俺答遂上書求貢明年春使子脫脫詣塞下申請督臣蘇祐以聞下廷議咸言邊事陵遲甚矣姑從虜以紓吾邊且永樂成化間嘗許女直三衛市何靳于虜詔給金十萬易布幣開市五堡漸及延寧以侍郎史道經略其事兵部郎中楊繼盛力條其不可大槩謂虜踐躡我八陵虔劉我赤子不能報而反與市損威重長寇仇甚矣今之爲謬說者不過曰吾外

假馬市羈縻虜而內得自寬修武備夫虜至逆也至無饜也人心憤之矣不及時激厲其氣用之而和以自弛使邊人媮好衣美食忘其憤而懈于戰將愈隳豪傑効用之心何備之能修往者邊私通虜吏猶得以法裁之今導之矣是開百姓不靖之漸也又不過曰得馬以資吾軍不知既已和矣馬焉用之且虜安肯捐其善馬以予我我歲糜數十萬而無所償于虜一不如意彼必敗盟以失信責我釁端百出此其害廷臣皆知之而莫敢言惟陛下獨斷上雅不欲市而方嚮用大將軍鸞鸞持市議堅相嵩唯唯而已上不能奪乃下繼盛吏謫去五月馬市成虜奉約頗謹我叛人蕭芹等素導虜謀中國不利虜款欲敗之謂俺答曰中國毒水上流伏甲市傍若幾殆俺答固心疑其左右復受芹賂爲言芹有異術能使城自頽愈益

動市畢潛犯左衛并使其黨爲內應會謀洩引還史道遣人讓虜虜內媿因以千騎隨芹入試其術不効遂執以與我論功道進尙書鸞太子太傅道復爲虜請以牛羊易粟廷臣多謂虜欲無厭不宜聽督臣蘇祐疏言一牛數庾一羊數釜米如珠而牛羊如山竭廩不能厭也虜無親而貪寒盟其心耳市虜以安邊也朝市暮掠何危如之必勿許詔從祐議召道還其冬大入邊殺掠邊臣詰之漫應曰此貧虜掠食耳我不能禁卽中國能禁民勿盜耶已復請市弘賜堡御史李逢時以非期拒卻之俺答恚益縱掠別酋把都兒辛愛破遼東新興堡殺指揮姚大漢等指揮王相以所部兵四百遏虜千戶葉廷瑞佐之戰俱力相死廷瑞重傷虜引去議者咸咎馬市非計鸞內恐因請邊塞毋扼虜縱其深入內外合擊之破必矣兵部謂

深入則蹂我畿輔縱能破虜其傷實多鸞議絀復請率兵出塞捕虜上不許然鸞實中怯無意行特恃寵嚙咤以虛聲聳朝廷三十一年秋鸞病死都督陸炳暴其奸詔剖棺尸諸市籍其家悉罷諸邊馬市更言者死三十二年春虜入大同口參將史略死之又入青邊口副總兵郭都死之遊擊孫邦丁碧力戰卻虜已又入延綏塞副總兵李梅死之其秋俺答把都兒自大同入徑趨紫荆急攻插箭浮圖等峪遊擊陳鳳朱玉率寧夏固原兵來援虜卻鳳玉追之過浮圖守者請犒師鳳玉曰毋緩賊吾旋軍享之及虜於三家村大戰竟日虜敗走未幾小王子入宣府塞抵赤城大掠而去俺答犯山西巡撫趙時春禦之諜言虜有遊騎二十去此兩舍可擒也時春擐甲欲馳總兵李涑爭不聽遂前伏兵起涑與子松及參將馮恩等皆

戰死時春走免三十三年夏虜犯大同左衛總兵岳懋戰死逮總督蘇祐
黜爲民其秋數萬騎入薊州塞總督楊博募死士擊之三十四年春犯馬
蘭峪參將趙傾葵等戰死總兵周益昌來援虜退其夏入青邊口參將李
光啓戰敗虜執以索贖光啓罵虜死其秋大舉犯宣大山西參將丁碧力
戰死參將馬芳以家丁夜劫虜逐出塞三十五年夏入宣府塞遊擊張縉
戰死軍盡沒其冬小王子及打來孫以十萬騎入遼東塞總兵殷尙質戰
死亡卒千人奪總督王忬巡撫薊志臯俸是年誅叛人張邦奇呂仲佑邦
奇衛舍人與丘富周原趙全李自馨等皆以白蓮教捕急先後叛入虜虜
居之豐州號板升板升華言屋也富最用事日夜教虜治攻具墾田積粟
收知略士與謀我邊民黠知書者踵歸虜俺答令富試之能者統衆騎不

則給甌脫地令事鉏耨御史李鳳毛言虜累入犯謀由富等乞令副使楊順計獲詔給順萬金毋問出入下令擒斬俺答諸酋予萬金爵伯擒斬丘富周原三百金授三品武階副總兵田世威密遣富故人王勳及弟浩入虜招富降大同人孫廷美亦陷虜與浩共說富富問儒生計安國留與歸孰便安國曰公華人也乃爲犬羊用乎今官家方急公宜亟歸取功名毋失邦奇謂富曰中國購若歸且遺之禽富怒令邦奇與浩質邦奇罵浩若賣丘公與中國耳富怒殺廷美浩約呂仲佑內應攻大同勳逃歸謀復弟讐適邦奇挾虜騎至邊索所藏倭刀讖書伏甲執之并得呂仲佑姦狀俱伏法論功陞賞督撫諸臣官計安國爲鎮撫厚恤浩廷美家三十六年春把都兒以六萬騎入流河口副總兵蔣承勳乘塞力戰死之西虜犯延綏

副總兵陳鳳及其子守義俱力戰死之其夏俺答入宣府塞殺參將祁勉等冬大掠大同塞俺答子辛愛妾桃松寨者以私通部日蠻帶帶懼誅來奔辛愛大恚縱騎索諸邊總督楊順懼議追還或曰無爾也我失丘富而彼得蠻帶沮降且辱國順竟私與之辛愛磔以徇虜自是益輕我大攻圍右衛數月不解右衛地斗入虜南一面通川虜分騎塞道衛大困故將尙表以轉餉至遮虜不得歸極力城守虜不能克議者欲棄右衛予虜上問大學士嵩嵩意欲棄之而難于言乃對尙書許論習塞事請問論論阿嵩極言衛難守搖上意上益發兵援三十七年四月兵大集虜解去其冬土蠻犯界嶺口馬芳拒卻之三十八年春兀良哈導虜由潘家口入大掠近畿詔逮總兵歐陽安論死切責王忬忬恐稱疾爲相嵩構誅復使楊博督

薊博經略頗有緒召歸其年俺答由鎮羌入西海留老弱豐州大同總兵劉□謀乘閒攻板升拔叛黨乃使部將王孟夏等以三千人先趨自以重兵繼之斬獲百餘縱火焚其居而不得丘富等其後富以掠邊中流矢死四十一年秋虜寇遼東塞總兵楊照率兵襲之敗死明年冬虜大舉由牆子嶺入大掠順義三河諸將孫臚趙溱俱敗死胡鎮拔柵走京師戒嚴上怒逮督臣楊選誅之虜留旬日引去四十四年冬黃台吉突入洗馬林把總江汝棟伏銳卒二百搏之幾獲以救至脫去明年肅皇帝崩當帝世虜諸部獨俺答強黃台吉其子也尤剽悍嘗勸其父母臣土蠻土蠻伐之不能克遂與連和亦不刺阿爾禿斯始雖逋匿西海爲甘涼患然猶與虜角其後亦折而入於虜塞東西岌岌憂之帝嚴明慮軫邊計一不當輒執戮

行閒大吏嘗一與虜市未浹歲絕之而邊臣顧私賄虜相與爲欺蔽邊大
圯隆慶元年秋趙全說俺答寇山西曰晉兵弱石隰閒多肥羊良鐵可致
也彼藉宣雲爲救遠來罷安能抗我俺答乃分六萬騎四道竝入入井坪
入朔州入老營入偏頭關卒皆悍勇邊軍遇之披靡副總兵田世威嬰城
自守遊擊方振出戰敗入壁創甚總督王之誥聞變率六千騎抵鴈門檄
大同總兵孫吳入援吳與山西總兵申維岳俱逗留不進虜薄石州攻陷
之殺知州王亮屠男婦幾盡進攻汾州趙全遣閒爲內應州人獲之得先
爲備虜攻八晝夜不能克遂分掠文水交城平陽介休閒所殺虜男婦復
數萬計邑里爲墟時黃台吉以偏師駐宣府塞下綴我兵之誥奉詔還懷
來護陵寢巡撫王繼洛駐代州不敢出虜留內地浹三旬無與抗者值雨

潦半亡其騎乃遷延出塞去事聞詔逮維岳世威論死繼洛謫戍邊吳落
職之誥罷去其月三衛酋董忽力勾土蠻入薊州塞大蹂昌黎撫寧樂亭
盧龍閒京師爲震總兵李世忠避虜不敢擊壁李家莊虜圍之援至乃解
總督劉燾巡撫耿隨卿檄諸將追虜會大霧虜迷失道墮棒槌崖中崖深
十餘丈積尸爲滿後騎踐之而過諸將張臣等訶知爭趨至割虜首報功
世忠乃濫及平民爲言者所劾詔謫世忠戍罷燾放隨卿歸里臣等以鹵
獲有驗晉二級明年春上詣山陵顧瞻塞下念薊急以譚綸督薊戚繼光
總兵綸與繼光皆嘗用南兵破倭相與計薊兵屢衄後有朝氣而無暮氣
不足賴宜用南兵益召募至三萬令卒治塞垣夾垣爲臺高數丈矢石相
及環薊而臺者三千垣周二千餘里虜自是避不敢深入薊三年冬西虜

吉能率精騎西掠熟番靈藏等族留餘衆套中寧夏總兵雷龍等襲擊之
斬首虜百餘四年夏俺答大舉犯平虜參將張剛幣賄虜使移攻威遠總
督陳其學率諸將馬芳等與戰漢虜相紛拏殺傷大當虜退剛下吏其學
去王崇古代其秋虜入遼東塞至錦州總兵王治道自山海關馳至欲出
戰巡撫李秋曰千里趨利兵家所忌將軍且休矣治道不聽促參將郎得
功先進治道繼之虜伏起兩將皆沒敗書至上方憂虜而大同報虜酋把
漢那吉來降把漢那吉者俺答第三子鐵背台吉子也幼孤鞠于俺答妻
一克哈屯所長而僇俺答愛之爲娶反慎部女曰大成比妓那吉又自聘
免扯金女未及婚會俺答有外孫女已聘襖兒都司矣俺答聞其美自取
之號曰三娘子襖兒都司怒且治兵相攻俺答懼奪那吉所聘女與之那

吉恚恨攜其妻及其乳母之夫阿力哥等扣敗胡堡求人總督王崇古大同巡撫方逢時相與計此奇貨可居吾豐館餽飾與馬予官爵尊顯之以示虜令俺答而急之則因與爲媾令繫板升諸逆以贖其孫不聽則脅誅那吉以牽沮其氣卽不然因而撫納如漢匈奴質子事使招其故部居近塞俺答老且死而黃台吉立我以一屠耆谷蠡秩秩那吉勢必爭兩族相持我因按兵稱助推亡固存那吉懷德黃台吉畏威安邊之大略也若循故事置海濱彼一窮胡雛何足重輕且恐失意颺去非計因具以其章上聞詔授那吉指揮使阿力哥正千戶御史葉夢熊疏爭之謫去時俺答方掠西番得報疾馳歸約諸部稱兵入塞索那吉趙全益教虜必困我那吉乃出一克哈屯聞全謀哭罵俺答曰耄悖不遄死信漢叛兒反覆乃欲侵

漢漢士馬強安能必得志是速殺吾孫也俺答乃擯全遣人來祈請崇古故不令見那吉引夷使登高閣騶從導那吉過其下使者訝此那吉耶胡爲乎漢威儀耶諦視之果那吉也大喜歸報俺答崇古因使使與俱說俺答曰趙全諸叛逆天下之惡一也惡于中國而保于爾何利請受而甘心不則勿復望那吉矣俺答始意中國恚其歲犯邊必殺那吉及聞無恙則大喜敬謝使者太師全吾孫我何敢藏叛虜稱我尊官爲太師也復使使來定約因請稱臣貢方物開市崇古爲聞諸朝未報屬黃台吉以萬騎趨大同崇古質責其使曰與我好而掠我何也使謝曰彼未及聞耳無他端因還語俺答馳召黃台吉黃台吉喜出張家口宣鎮兵斷其歸路虜前部欲戰黃台吉曰戰則敗約我無辭于太師整兵而西出拒門堡俺答隨收

捕趙全李自馨劉四呂老祖諸逆梟以獻周元聞變服毒死始全與丘富俱附虜富死全益重虜初入塞止盜村落不敢入城堡全教虜左右疏計課校人畜益習攻取圍困掩襲事諸鎮疲于奔命矣全有衆萬人騎五萬牛羊稱是自馨及元差減最下者亦千騎俺答每欲盜邊先置酒全家計定乃行全爲俺答建九楹殿奉居之尊爲帝會大風飄棟瓦殺數人俺答懼不敢居而全等各建堡治第擬于王者陷石州時全計曰自此塞鴈門扼居庸據雲中上谷効石晉故事南北之勢成矣朝廷屢購之不能得至是乃伏法全未至時已詔那吉歸俺答迎之河上祖孫嗚嗚相勞苦曰帝天也覆露我使使入謝申請貢市崇古爲奏虜款堅宜聽且乞詔邊臣毋燒荒搗巢生虜釁下廷議兵部尙書郭乾言虜方求款卽要我以不燒荒

不搗巢他日者若要我以不乘塞不設備其將如何宜更議毋遽許廷臣咸言市虜先帝所禁柰何弛之崇古言先帝時虜方張又勾自逆鸞故盟易寒今虜實仰我搏頽待命何慮何嫌而絕之歡且國初嘗王和寧王順寧矣弘治閒小王子三歲三貢矣是之不遵而徒藉口于先帝何也因條爲八議以進廷臣言利者十三言害者十七相持不決大學士高拱張居正力言崇古議是請于上報可五年三月封俺答爲順義王昆都力哈及黃台吉爲都督同知把漢那吉爲指揮使賓兔台吉等十八人爲指揮同知那木台吉等十九人爲指揮僉事打兒漢台吉等十八人爲正千戶呵拜台吉等十二人爲副千戶恰台吉等二人爲百戶昆都力哈卽老把都也賜勅俺答曰我祖宗受命御宇內外率育朕纘承不替頃因爾孫來歸

特命邊臣護視以禮遣還爾懷哉朕恩稱臣奉貢俘獻叛逆悃誠用章朕遠稽前代近覽本朝款塞稱藩厥有舊典是用錫爾王封并及子姓部落皆有常秩爾當堅守臣節約束爾衆毋爲邊患朕亦勅邊吏同好棄惡爾毋食盟自干天罰俺答率所部受詔甚恭使使貢馬謝百官班賀兵部下市令貢馬不過五百匹簡上駟三十進御夷使不過百五十人設藁街于邊城無令入都市期自二月至四月爲率大同于左衛威虜堡宣府于萬全右衛山西于水泉營俺答以威虜無水改市得勝堡黃台吉與父不相能欲自別異市新平堡市物虜以馬雜畜皮毛我以金銀綵繪諸貨官市畢聽民市是年九月報市成凡得馬七千餘匹官給直六萬緡賞賜酒肉布帛費四千緡西虜吉能等復請市詔予吉能市紅山墩切盡著力二酋

市寧夏清水營始俺答受封時切盡等在營語使者曰我西陲之酋也帝何遺澤焉崇古令使者好語曰若無虞陝西太師行爲若請矣旣而總督王之誥議令數歲不盜邊乃許崇古言吉能與俺答叔姪勢相依倚許俺答而不許吉能俺答必陰呼吉能市晉吉能亦必陰誘俺答窺秦彼兩利也市晉則物力不給窺秦則關隴騷我兩害也將旦夕生患安能數歲之誥議非是之誥去戴才代才上言陝西市諸番歲久不可令虜雜其閒延寧二鎮雖迫虜然法令嚴無寸帛闌出者柰何自弛禁使虜生心無已則令東市三鎮示羈縻上謂讓才而封吉能爲都督同知部酋四十九人授指揮千百戶有差卒許市方三鎮市畢虜更乞月一市崇古爲請不許明年春老把都吉能相繼死俺答表言欲歸心佛教請金書經及刺麻僧

詔給遣之已復以四事請給順義王印封諸壻市鐵鍋聽虜使入京崇古皆言宜許兵部議既予封矣其何靳于方寸之印予之當鐵鍋宜勿予卽予予銅母予鐵使者毋聽入止而饗之邊諸壻稍給財物毋輕予官從之俺答機變械飾身赴市場凜凜遵約陰令其子弟躑躅邀索因而調停示德黃台吉市每後期部下卒時掠我民復劫車夷革固等東徙革固者不知其所從來嘉靖閒始流居宣府塞下而先是有史夷者亦以黃台吉暴虐自拔歸御史劉良弼言二夷雜處爲我外藩車夷旣劫則史夷之勢自孤史夷復去則北路之藩盡撤中國制馭不可不謹詔俺答歸車夷自俺答款後塞下稍寧邊臣皆論功受賞大學士拱上疏言夷性如禽獸然順其欲則搖尾乞憐違其願則狂顧反噬非可以禮義馴法度約者也當先

帝時虜遣使求貢不過貪賞賜關市之利耳而邊臣倉卒不知爲謀當事之臣憚于主計斬使絕之致挑虜覺自是大舉內犯直抵京畿三十餘年迄無寧日使邊民肝腦塗地膏腴棄而不耕屯鹽廢壞豈惟邊事不支而帑儲竭于供億士馬罷于調遣中原亦且敝矣此則往事失計之明驗也天佑國家胡雛委命朝廷處置得宜虜遂感恩請貢斯實天以安攘之機授我于是因而受之名順義美較之往歲呼關要素相去千萬九夷八蠻聞風慕義孰不向化威靈所被南洽北暢斯亦千古之一時已然臣等所爲深謀遠圖則不在是昔先帝嘗切宵旰之憂下詔修塞者屢矣然財力俱傷迄無成效者非徒奉行不力之過也實以虜擾應接不暇尺寸未成而尋丈已壞矣今虜効順受封九塞晏然出國家什一之富以收胡馬之

利招中國攜貳之人以散勾引之黨沈幾密畫次第舉行卽虜或背成而我歲有歲功月有月効十年無事常勝在我矣則和可戰可寓戰于守寓守于戰亦可此則邊臣所當加之意者也如昧制馭之權宜苟一時寧謐遂爾偷安卒然有變何以應之則其患又自今日始矣臣請三歲遣近臣視塞以八事殿最邊吏積餉修險練卒鍛甲督屯理鹽養馬招降皆以數課計治其功罪績最者同斬虜廢壞者倣失機上嘉納焉至其後奉行鮮實虜亦浸驕不如約市直日增至歲糜金錢數十萬緡巡撫王象乾力爲裁節邊乃甦瓦刺自正德後稀往來嘗與虜戰殺其酋虜部每西行輒以復讐瓦刺爲名大蠶食諸番西北苦之而東虜土蠻數入遼東塞李成梁守遼東以功封寧遠伯

論曰北狄之盛至勝國極矣不有大聖人興孰爲驅除觀我太祖之命將
徂征神謨獨運元侯樹屏九塞周防信禦戎之上策也永樂之世大鉞親
麾王庭屢躡至使內帑竭于軍興遺弓墮于朔野夫寧好戰蓋懲臚胸之
衄深謀燕翼故勤萬乘勞士馬而不悔耳威靈震被再世晏如爰及正統
凶燄復張加以行人失辭戎心無厭渝盟犯順輅馬震驚苟非社稷有靈
夷庚旋復禍患之興曷云其極跡所由來固款貢爲之階也是以景皇深
懲往事杜塞釁萌行李罕入其疆聘覲不報其使綢繆補葺上下協心虜
亦叛亂相尋鳴弓內競彼紛我睦邊鄙雖或小虞而國威幾再振矣其後
干撻弛警自撤藩籬東勝朔方莽爲豺虎引寇屬垣邊城晝閉威寧一戰
虜膽稍寒而根結旣深蕩除未易揚塵飲馬羽檄交騰孝皇赫怒興思犁

庭之列顧問公卿張皇撻伐事雖不行夫庸非仁者之勇歟正嘉之際黠酋暴興族類蕃滋近世未有曾銑發憤建謀欲傾其巢穴還我舊疆而帷幄構爭蕭牆生釁伊吾之劍未鳴而身首異處矣豈不痛哉虜旣得志益肆憑陵鳴鏑天都徹烽大內師中之寄委于匪人騎士材官雲蒸霧集而不敢以一矢加遺虜氛日惡厥有由然穆皇初歲度劉汾石幾無孑遺屬天厭亂孽虜扣關遂緣舐犢之思用蠲放斃之德桑椹旣食好音是懷馴異類于壇坫拯氓隸于干戈亦云盛矣而玩愒寢生軍實耗墜迎佛掠番狡謀百出金錢內盡藩籬外撤故識者憂之夫關市之費省于轉輸款塞之稱美于和戎琛幣之交安于鋒鏑此邊臣之所禱祀而求也然而尋得失于累朝考虜情之終始乍臣乍叛不可爲常故二祖驅之于前列聖絕

之于後雖閒或慕義貢獻不卻其誠而安攘之大猷在彼不在此矣夫順者逆之機也安者危之伏也易云喪牛于易詩云爰居爰處爰喪其馬六經之治貴于未亂可不謹哉

鹽政考

館課

國家之制鹽政也蓋邊政也鹽政修而邊政與之修也鹽政弊而邊政與之弊也其故何也國初召商于塞下輸粟餉邊給之鹽引一引而粟二斗五升耳無重糴之費也所司毋留行食祿之家毋侵利一切奏請毋私予無傍奪之孔也竈戶給以攤場草蕩每引給工本鈔二貫五百文有私鬻違禁者死無潰漏之奸也故鹽政修也塞下之地盡墾而爲田坻京露積士飽馬騰無枵腹之憂也邊郡旣實內地益充民得甘其食美其衣老死

不聞徵發無轉輸之苦也屯堡星聯兵農雲集耕夫得安于力作而胡馬不窺于長城無蹂躪之擾也故邊政修也鹽政之弊也則有存積常股之害興常股七分以爲常而存積三分以待塞下之急倍賈開中越次放支是法以罔利弊也則又有折銀之害興商輸之運司運司輸之度支度支輸之邊內帑苦于供億沃壤化爲蒿萊急目前之羨餘忘百世之長利是法以見小弊也則又有奏討占窩之害興勳戚權倖夤緣請乞名曰餘鹽恣行夾帶但憑城社無敢譙訶是法以私竇弊也則又有增價之害興成化開折銀三錢五分耳正德閒則四錢五分嘉靖閒則七錢官有羨征商無溢入是法以重課弊也則又有衙門要索之害興商登籍于戶曹趨而給引于南戶曹又趨而受鹽于運司又趨而至于行鹽之地往來馳逐動

經旬歲奸徒憑其翕張墨胥視爲囊橐然且有罰之金贖之錢關節之苞
苴操踰束濕利盡吹毛是法以侵削弊也則又有守支之害與程期累次
魚貫積薪沒身無及妻子代支資斧竭于餽糧錢神疲于公府是法以留
難弊也更此數弊商困極矣乃竈之病也則又有總催之害與攤場草蕩
半爲并兼賑濟官銀全被乾沒分產凋零傭奴服役是法以豪強弊也則
又有賠累之害與鹽一入官雨水消鎔督償日急鞭朴無聊流亡轉徙乞
貸爲生是法以操切弊也嗟夫管仲佐霸吳淠竊雄弘羊心計劉晏轉輸
鹽之爲利從來久矣國初經制遠邁前籌乃在今日潰決萬端商竈兩病
頃邊事又告急矣膏脂旣竭輸輓日艱督餉文移填委于司農之府當事
咄咄計無復之茲非所謂鹽政弊而邊政俱弊之明驗歟窒罅鑄導流以濟

緩急則其說可稽已減額課也省搭配也早掣支也絕請乞也清場蕩也給工本也寬私禁也乃其要在處置餘鹽也餘鹽溢而私販多矣私販多而正課阻矣正課阻而國用虧矣縱之則病商操之則病竈操縱兩失其宜則亡命之輩潛山泛海之徒得陰持其柄以爲市今淮揚之間高牙大檣橫行出沒關吏不敢譏而有司不得詰者皆私販之奸人也無事則竊利權有事則爲亂階是寧可不杜其源而防其漸哉故先臣丘濬欲行給牢盆法而霍韜欲復國初鈔法凡皆以收餘鹽之利而塞扞網之端操是說而推廣之要以存竭澤之虞寧稍通融于商竈嚴吞舟之禁毋輕假借于奸徒使利行若流商至如歸無倍征有溢賦不亦今日資鹽策便國家之長計哉若夫講求立法之本意修明已試之舊章復飛輓廣屯田塞下

餘紅腐之饒度支省轉餉之苦鹽政邊政兩利而俱存則二祖之功令在又何論于區區補偏救弊之勞也

屯政考

館課

屯政者自高皇帝元年令諸軍屯種龍江始也其行於九邊自宋訥獻守邊策立法屯布始也當其時邊境旣寧撤守關士卒僅僅備譏察外悉令屯田人受田五十畝賦糧二十四石半贍其人半給官俸并城操之軍其區畫何甚詳也文皇帝納黃福之請至欲廣屯於遼陽而遣人徵牛于朝鮮且令各荒屯曠土能自開墾悉蠲其賦而寧夏總兵何福以積穀獨多下璽書褒諭其激揚何甚至也列聖相承遵而不廢宣德中屯法大行頻歲豐登邊土一切用度多以粟易於是令戶部灌輸買糴多至二三十萬

右少亦不下十萬而天順中都御史葉盛巡撫宣府修復官牛官田法墾田益廣積穀益多以其餘易戰馬千八百匹修築屯堡七百餘所其收利何甚博也蓋國家所以強本實邊禦虜安民酌成周寓農之規鑒近代養兵之弊管仲讓其籌晁錯屈其算而趙充國諸葛亮羊祜郭元振韓重華諸人遜其功效法至善也其後奉行不善屯種軍餘苦于賠補相繼逃亡田畝日荒而九邊供輸之費遂以大困惟時心計之士碩畫之臣相與持籌布策講求修復爲國家建無疆之利而竟因循廢格日以滋壞及嘉隆以來累清屯田雖時盈時耗而較其見存之數大約損故額十之六七矣蓋在洪永閒遼東屯糧以石計者七十萬今十七萬甘肅六十萬今十三萬寧夏十八萬今十四萬九千延綏六萬今五萬薊州十一萬今僅視延

綏山西計其初當亦不下十萬今得二萬八千有奇是何盈縮相去若此甚也愚嘗考求其廢敝之由可爲振舉者四而其可以徐議未可卒圖者一祖宗時屯田諸軍給與牛具種子優恤甚至且不許他役妨其農務其後邊事漸興多抽屯軍補伍于是屯種之人失其本業而田遂就蕪此可爲振舉者一也祖宗時沿邊曠土盡以給軍閒有肥瘠不同則令視其歲收之數而考較之謂之樣田其後貪漁將領多私其腴區而移磽瘠于軍士低昂竄易糧益不均重以豪右侵奪而農事益弛矣此可爲振舉者二也祖宗時武備修飭各邊多築城堡且耕且守得以爲備故人皆自完而不虞虜其後邊險稍失城堡多湮胡騎縱橫出沒擾我禾稼卽欲力耕厚積徒爲虜外府耳此可爲振舉者三也祖宗時賞罰嚴明政不媮窳管屯

之官皆覈所積之多寡而定其殿最故人自勵其後玩愒成風上下相承以管屯爲職者優游城市而不見阡陌之巡以督屯而來者憑信簿書而不較倉庫之實踵弊襲偷恬不知怪屯政之廢又何惑乎此可爲振舉者四也若其利病得失之原則又有大於是者蓋國初鹽政修明輸粟給引賈人子以積粟爲利各自設保伍募衆督耕畚鍤盛于戈矛墩埤密于亭障軍民錯居守望相助屯田之興于斯爲盛其後納銀例開無所事粟商旣散歸屯亦大廢不數年間邊事坐困矣故今議者咸謂鹽政不修則屯政難復本本原原其說當矣顧愚以爲守法易復法難法在而復之易法亡而復之難今鹽引納銀從來已久一旦督粟于邊吾恐度支之令未下而輸輓之怨先興也兼之軍國經費半倚商縉必欲以粟易金弊且捉

衿見肘吾恐邊士之腹未充而司農之計先窘也所謂可以徐議而未可卒圖者蓋謂此也嗟夫九邊重鎮國家根本強胡跳梁日睥睨其閒而空虛若此至竭天下之脂膏猶不能給主計者徒仰屋而歎是不亦可爲寒心哉今鹽法之舊雖未能盡復亦宜講求屯田之意專委大臣督以修舉令沿邊之人隨宜占墾毋問所從來但使荒蕪日闢穀價不騰不必紛紛清勸以滋厲階俟人心樂趨邊境稍戢然後廣徵吏士搜理舊章需之歲月遠收其利此皆今日之所當亟議者也夫欲內省民力外裕邊儲積豐于垣士饜于伍不煩輸輓之勞無乏軍興之備以撻虜制戎伸威固國非屯政曷繇哉愚故略著其顛末令憂國者得以考覽焉

京營兵制考

歐陽公有云古之有天下者其興衰治亂未始不以德自秦漢以來鮮不以兵嗟夫兵之重也寧獨秦漢以來然哉蓋在周之盛時伍兩卒旅之法統于大司馬者已最爲詳備天子至躬萬乘之尊修韎韐秘瑋之容以從事于行閒故武備日張疆場無虞迨後畿輔削弱至不能具一旅之師以至于亡兵之重也若此矣歷漢而唐而宋代有建置然竟皆不振豈其初制固然哉積漸之弊使之也我國家置兵監酌往代二百年來京師無肘腋之虞強臣無專制之患爲謀臧矣顧兵政之設易壞難修其盛也南勦北伐威加方外而其弊也至尺藉空虛大司馬四顧張皇計無所設至厯廟堂宵旰之懷也則豈非因循耗蠹之大驗哉蓋明興制兵有五軍營五軍營變而爲三大營三大營又變而爲團營團營又弊而戎政府之名始

立矣其沿革之由盛衰之故大槩有可考焉五軍營者高皇帝所定也藉留守等四十八衛之衆而訓練之有中軍有左哨有右哨有左腋有右腋而總之曰五軍無事則戒弓馬習技擊環衛都城有事則簡師命率分統以出事已而休制至善也文皇帝時仍五府之舊增七十二衛又以龍旗寶纛等物下三千胡騎立三千營後征交趾得神鎗火箭之法立神機營是爲三大營三大營之訓練如高皇帝時而河南山東大寧中都四都司之軍又歲以班操至春秋番練如三大營益詳備矣洪宣之世海宇昇平兵革不試將媮士窳日以廢壞至于正統嬉恬益甚京營之兵幾不能受甲此己巳之變所由興焉于肅愍逢多難之秋深惟良策迺于三大營之中拔其驍銳分爲十營營萬人其統之之官則隊長統五十人隊官統百

人把總統千人都指揮統五千人訓練之方則有八陣八陣分而爲六十四陣纖微委曲咸有條理雖未能盡如祖宗之舊要以救弊舉廢振弱爲強斯亦有足觀者矣大抵法久則蠹人久則玩以二祖之盡制曲防勢禁形格不三傳而遂壞其壞也以肅愍之忠勤景帝之責任日夜焦勞而僅僅得十萬之師爲國家用亦足以明兵政之易壞而難修已天順初年務反景泰之所爲遂革團營八年而復成化初再革二年而復又增爲十二營曰奮武耀武練武顯武曰敢勇果勇効勇鼓勇曰立威伸威揚威振威營萬人京兵八萬益以外兵八萬分兩班隸之期年一報代初十二營之選也其任者名曰選鋒不任者歸本營名曰老家老家固已孱弱而所謂選鋒者歲久而浸失其初供役于私門培植于主帥上下相蒙苟歲月無

事愈益脆懦斯其與老家何異也庚戌之後虜叩郊關而無能以一矢相加遺都門書閉烽燧燭天肅皇帝震怒責令廷臣博謀所以強兵禦虜之略諸臣迺請復三大營改三千爲神樞統以勳臣督以樞臣巡以臺臣省臣其大指俱如洪永時而規制爲備上是其議著爲令及今數十年矣其蠹弊之端又有甚于曩日者當文皇帝建三大營時挽疆超距之士不下三十餘萬一損而爲十萬再損而幾于無兵嘉靖雖復祖制而兵籍存者不能加團營之數又缺額者十之二三挂名投閑買差替役者又十之二三則當時亦已無兵矣況在今日而欲求抗旌揭竿射石飲羽之夫爲國家用安從出乎此其故難言之矣夫將之于兵若家人父子之相屬也故必休戚相通而復能臂指相使今京營諸將非皆以才見庸素拊循士卒

者也多賈人子厚金帛結中官權貴而爲之請託者耳夫彼旣輸財于此不得不取償于彼故有索月錢需常禮恣意誅求若以爲當然而不可易者國家歲漕東南之粟數百萬石以贍兵而兵歲出月糧之半以贍將將愈飽而兵愈饑甚有典衣鬻兒而枵腹待命者矣何以振士氣而鼓其銳乎此病在將領之侵奪也夫器不用則敝士不訓則衰今京營將士教戰之法歲不過數月月不過數日其下操也日不識進退之節手不習擊刺之方相與趨走吶喊若角觝拔河翹木扛鐵之戲已耳甚者挾無弦之弓插無羽之矢懸無鞘之刃質明而入未午而出以爲故事若此耳又甚者于下操之日責追贖緩漫無統紀又甚者豪門占役市井竄名冒支經費按牘而求其人皆不可考行伍安得而不消營陣安得而不廢乎此病在

操練之寡實也文皇帝集班操之兵蓋強本深根之大慮非以人衆飾觀爲也嘉隆閒率供土木之役番鋪是勞未嘗操戈執銳以從事于戎行弊且寸挺不持空身備伍迄于今日因仍已甚領班之將復多貪漁富者賄免貧者氣奪彼其數千里裹糧赴命流汗浹踵而不得休迺使之營不急之務應無藝之工重爲其帥所苦雖使孟賁烏獲復任徵發亦安能昂首伸眉度功絜藝乎此病在班操之失制也先皇帝時蓋亦深燭其弊上下咨嗟太息求爲經遠之計而人情久弛振刷爲難日復一日偷安自喜脫一旦有意外之事發于倉卒國胡以支之誠使欲改弦調琴桑土綢繆則莫如議任將必以軍功多者猷望著者敷歷深者乃充其選而紈袴之夫勿使之建旗鼓而坐于將壇之上也又莫如議責實器械必精伍兩必備

蒐簡必嚴諸游惰者法後期者法將弗恤士者法堅持而行之勿因人言不便而遂廢格也又莫如議存恤凡士番休至者毋苦以他役使得一志畢能各習其務曉然知國家所以勤勞訓誨之意而忘其跋履之難一有緩急能得其死力而後可也如是則有將有兵戎務稍舉而又時稽其充耗月程其功效使祈父之謠不興而六師之勇自倍卽二祖威靈可復振也又安在兵制之詳略哉

國家圖書館



001685056

